

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

1 ¹Janiyari Pablóni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupaajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niaacuarani.

²Pueyasocuaajaari tariucuacaanu na sequenu panishano caminiujiuninaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani.

³Pueyano na quiniuria mijiria, Neyanu Jesucristoori rasaaquiaari. Na supueta-naari quiquiaari Israel pueya jiyaniijia David. ⁴Jesu sohuanuuri saniniuuja pueyaracaanu Pueyaso Nyanujuhuanajaj. Paa cutaraari quiari naataja niishitishaa-quiaarini, nojuajaari seetanujuanaa Pueyaso Nyanu. Paari quiaririja na niishiya seetanujuanaa cutarani, Pueyaso Sohuanu samiitianiniuucua nojuaja macujiniji. Nojuajaari tari jiyatesaaquiaari jiyaniijiajanaa na quiniuria, puetunu cumacajanaa na jiitianurajuhuj. Nojuajaari pa Jiyaniijia Jesucristo.

⁵Nocua canaa tiuuniuucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajininio pueyajanaa canaa

tiutiniuria Neyanuucua, na tojitiajaca nojori quiniuria. ⁶Niajaniyajuhuj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniurajuhuj. ⁷Puetunu Pueyaso panishano pueyajanaa, canapue Pueyaso saquiriojoquiaari saa maninija nojori quiniuriacuajani, janiyari niaacua-ra naajioteyani. Pa Que Pueyaso, pa Jiyaniijia Jesucristojuhuj, nojori cuaara cumaquiriiri niajaniya, maninia na tojijia nia quiniuria. Naajuhuj, nojori cuaara nioojiaca cajitiiri shuquiriaatia nia quiniuria pueyaracaanu.

Pablo naquerejosacari Roma tiacajiniara

⁸Coteenu nia sequenu paniyanijia, janiyari nia timitiaquiaani, maninia niajaniyajiniji pueya pohuatanuucua puetunu jiyacajinijanaa. Nojoriiri pohuataquiaa, niaanaari maninia tiuujiaca pa Jiyaniijia Jesucristoocua. Naa Jesucristo miiniuucua niajaniatej, janiyari cua Pueyaso sequequiaani: “iPaacarasho! Quiaari jiyano hua maninia”. ⁹Janiyari pueyaracaanu cua Pueyasora poonijioquiaani puetunu cua cumacatajanaa, Neyanujiniji cua pohuatanura. Pueyasocuaajaari niishiya, pueyaracaanu cua secojosacari nojuaja, janiyari niaacuara secojoquiaajuhuj. ¹⁰Naa cua secojosacari nojuajatej, janiyari na sequequiaani cuaara cua tiuquitiiri niaacua, rupaquijia cua

quiniuria niaata, nojuaja jaara naa paniri.

¹¹Janiyari nia niquiniuucua jiaatiaani, cua cumaquiniuria socua niajaniya na Sohuanu cumaacata, socua jiyanoehua Pueyasocua tiuujiaa nia quiniuria.

¹²Majaari cua cumaquiniu paniniu saa niajaniyaja. Janiyari paniyani nia cumaquiniuria janiyajuhua. Naacujitij, mariyata pa tiuushacari Jesucristoocua, paari mariyata cumaquitoojonutaniyani.

¹³Cuarta Pueyaso muerasunaa, janiyari nia sequenu paniyani nia niishiniuria, janiyari sequeyarucua niaacua naquerejoquiaa juucuan. Majaari juhuanojuaja cua naata quianu niaacua. Janiyari Jesucristojiniji pohuatanu paniya tii Roma tiacajiniani, tee nia quiyacuajani, cuno taucuaca tiuuniuria Jesuucujuhua. Tamonu jiyacajinia taucuacaari tari Jesucristoocua tiuujiaa quiyacuaa, cua pohuatanuucua Jesucristojiniji nojori niquiara. Janiyari naa miiniu paniya nia tajinijuhua. ¹⁴Cua Jiyaniijiaari cua jiyatequiaari na rupaa pohuatanara. Janiyari cunora na rupaa pohuataquiaani. Majaari na tojiyashijia cua quiniu paniniu. Naaratej, janiya cuaara pohuataara na rupaa puereetuca tiacajinia pueya niquiara, mariyata tiquiyocua quijiaa pueya niquiarajuhua. Janiya cuaara na rupaa pohuataara niishijiaa pueya, niishiyashijiaa pueyano. ¹⁵Janiyari cunora quianu paniya Roma tiacajiniani, cua pohuatanura Jesucristojiniji niajaniya.

Pueyaso Rupaari cumaacaraca na jataniniuria pajaniya

¹⁶Maja cutaraari cua caririquiniu Jesucristojiniji cua pohuatanura. Jesucristo rupaacuajaari Pueyaso cumaacaraca, pueya na jataniniuria Pueyaso muerasu nojori quiniuria, nocua nojori tiuushacari. Puetunu Jesuucua tiuunaa pueyapuejanaari Pueyaso

pueyara jatanishaanutaniya, taa Judiocuaca jatanishaaquiaa Pueyaso pueyaracuaani. ¹⁷Jesucristo pohuatasanojiniji paari niishiyani, Pueyasoori pa jiyanoquiaa sesa pa miishanojiniji, saaja Jesucristoocua pa tiuushacari. Saaja nocua pa tiuuniuucua, paari Pueyaso pueyara jatanishaaquiaani. Cunora, naa naajiotasano quiyacuajaari tariucuacaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriaatia quijia quiniutianiya, saaja Pueyasocua na tiuushacari”.

Pueyasora, puetunu pueyajanaari sesa miijiaca

¹⁸Pueyasoori jiyocuacaanuji na tojiyashijiaa pueya saniitioquiaa. Naa nojori na saniitiosacaritij, Pueyasoori nojori numootequiaa, nojuajaari puetunu na tojiyashijiaa pueyajanaa saniitionutaniya jiyanoehua na juaaniutia. Naa saniitiosaanutaniyajaariuhua, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. ¹⁹Nojori jaara Pueyaso niishiniuucua jiaatiariquia, nojori maara na niishirij. Pueyasocujaari tari nojori niishitiquiaari taamuecate nojuajani. Nojoricujaari tari maninia nojuajiniji niishiya. ²⁰Majaari pa naata Pueyaso niquiniu pa namijiata, pa niishiniuria taamuecate nojuajani. Naajaa, Pueyaso shipininiuucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuan. Na shipinishanojiniji niishishiyajaariuhua, majaari na cumaaca puequenu quiniutianiya. Pueyaracaanu quiriquianoori. Naacujitij, Pueyaso saniitionu panishacari na tojiyashijiaa pueya, nojoriiri maja na naata sequenu quiniutianiya Pueyaso:

“Maja canaa niishini quijia quiajanijaji-niji”. ²¹Nojoricuajaari Pueyaso niishijia najuhuanaj. Na niishijiaa nojori quishacari, nojoriiri saaja na rerequeteja. Nojoriiri na tojitiaaquiiaajuhua. Pueyaso miiniucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueyasonaa”. Tama nojorijiaaritia jiyanoahua cushitiiquiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujiaari juhua ninishiquiria quiquiaa. ²²Nojori jiyanishacari nojori cutaraari seetanujuanaa niishijiaa, naacujitij nojoriiri socua niishiyashijiacara quiquiaa. ²³Nojoriiri Pueyaso shuquiritiaaquiiaa tama nojori shipinishano casaajaaja nojori shuquiritianura. Pa shipininia Pueyaso cutaraari jiyanoahua cumaacaraca, pueyaracaanu quijiajuhuanaj. Nojoriiri Pueyaso niti shuquiritiaquiaa tama nojori shipinijiosano juuaaja. Cuno, nojori shipinijosano Pueyaso niti na shuquiritiasocoriquiano-ni, cunoori quiquiaa juhua shaajeja pueya niquishano, juhua jaacuatujuaca niquishanojuhuaj, juhua nacujiniaaco canujuucuatujuaca niquishanojuhuaj, juhua roshiyocuatujuaca niquishanonio.

²⁴Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacujitij, pueyari tama na cuaqueyajaaja miiquiaa sesa, cararaatia nojori miitioosacari narta pueyanota. ²⁵Naa sesa mijiaca nojori quishacaritij, pueyari seetanu casaajanaa Pueyasojiniji niishishano ruuretaquiaa, sapojonuunu nojori tojinuria saniniuuja. Naaratej, pueyari Pueyaso shipinijosano casami shuquiritiaquiaa, saniya na Shipininia niti. Nojuajaari pa Pueyasojuanaa cutara. Nojuaja cuara shuquiritiasaaria pueyaracaanu cutara.

²⁶Pueya jaara Pueyaso cartequiaa, Pueyasoori nojori tarinitiaquiaajuhua, cararaatia casaa nojori miiniuria, taa nojori jiaatiaquiaa miiniuriacuajani. Naacujitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷Naajuhua, canuuri maajitia quiniu paniaquiquiaa, sacuaraatia na jiaatiasacari narta canuucua. Canuuri jiyanoahua cararaatia miitiooquiaa. Naa nojori miiniucuatej, nojoriiri tama na cuaqueyajaaja miitiaquiaa naquiya na miishaanura.

²⁸Nojori niishiniu paniaquiniucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na mijiaca quiquiaa, cararaatia miiniu niishiriojonuujuaca nojori quiniucua. ²⁹Naacujitij, nojoriiri puetunu tamaatia sesa miishanojuanaa miiniu niishijiaa. Jaara sesa miiri, timiquioyari. Nojoriiri nio mijiaca: puera casamiriaca quiniucua jiaatiajaca. Sesa miiquiaari na panishano nojori jiitianura. Nojoriiri tamasaca pueya jiitiasano casamiicua jiaatiajaca. Nojoriiri pueya puecojuaca. Nojoriiri pueya ruutaqueja. Nojoriiri na panishano casami nohuase-nuujuaca jiyasohua. Nojoriiri narta pueya miitianu panijiaa. Rimiaacaturijiaariuhua. ³⁰Nojoriiri sacuaraatia sequejojua narta pueya. Nojoriiri Pueyaso niquiniu paniyashijiaa. Nojoriiri tamasaca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasacajiniji. Nojoriiri najuhua sequeja: “Janiya maninia mijiani”. Nojoriiri jiyanoahua niishijiaa, niishishoo sesa casaa na miiniuria. Nojoriiri na queya tojiyashijiaa. ³¹Nojoriiri seetanujuanaa mosanucua Pueyaso na tojitiaaquiiniucua. Nojoriiri saaja tama

na rupaajaaja jataja. Majaari na sequesano na miiniu. Nojoriiri narta pueya panyashijiaca. Majaari nojori niishiniu jiyanooniu. Majaari nojori niishiniu taraajenu narta pueyacu. ³²Nojoricuaajaari tariucuacaanu naa Pueyaso sequesano niishiya: “Cante naa sesa mijiicani, cuaara puecoosaaria”. Naajaa, nojoriiri saaja sesa miquiaa juhuajaniya. Majaari nojori quiniu shuquiriaatia saaja tama nojori miishacarijaaja sesa, nojoriiri shuquiriquiaajuhuj tamasa jaara sesa miiri juhua nojori.

**Pueyasoori sesa mijiaca saniitionutaniya
sesa nojori miiniuucua**

2 ¹Naacujitij pueyanaa, niaa jaara tamonuucua tonujujua quiriquia, majaari nia jyaniniu niaari sesa miyashijiaca cutara. Niaa jaara tamonuucua tonujure sesa na miishano, niaari tama niaacurajaaja tonujija naa sesa miiniu niishijiaca nia quishacarijuhuaj.

²Paacujaari niishiyani, Pueyasoori puetunu sesa mijiicajanaa saniitionutaniya, maninia na niishishacari nojori mijiiosano. ³Quiajaniya saniniujia, quiarta pueyacuara tonujujanaa, majaari quenaaja quia jyaniniu quiaa saniitioyaquishaanutaniya. Quiaari saniitiosaanutaniyajuhuj. Quiaacuajaari juhua nojori, sesa mijiiajuhuaj. ⁴¿Majateeri quia niishiniu, Pueyasocujaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miquiaa. Quia rejeretaquiaajaariuhuj. ⁵¿Quiaateeri jyaniquiaa Pueyasoori naa maninia quia miquiaa, maninia quia quiniucua na niquiara? ¡Maja! ⁶Quiaari quioojia tacatonu panyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijijianaa saniitiosaanutaniya jiya puequesacari.

Jiyacaritij niishishaanutaniyari, Pueyasoori seetanujanaa maninia saniitiojua. ⁶Pueyasoori puetunu pueyanaa miiniutianiya taa nojori miishano quiquiaari mijiriacuajani. ⁷Naacujitij, Pueyasoori maninia mijiaca jiyatenutaniya pueyaracaanu rishijiacara. Nojoriiri pueyaracaanu maninia mijiaca quiquiaari mijiria, Pueyaso timitiasano nojori quiniuria, shaajeyashijiaca nojori quiniurijuhuj. ⁸Saniniujia, Pueyasoori na tojiyashijiaca saniitionutaniya jyanohua na juaaniutia. Naa saniitiosaanutaniyajaariuhua noo pojori, canapute saaja sesa miiniu panijiaca quiquiaarini. ⁹Puetunu sesa mijiaca pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuaani. ¹⁰Saniniujia, Pueyasoori puetunu maninia mijiaca pueyapuejanaa miiniutianiya maninia, taa maninia mijiaca Judiocuaca miishaanutaniyacuaani. Pueyaso timitiasano pueya nojori quiniucua, nojoriiri jyanohua shuquiriaatia quijiaca quiniutianiya pueyaracaanu. Naacujitij, nojoriiri juhuajaniya quiniutianiya Pueyasota pueyaracaanu.

¹¹Pueyasoori maja rimiajata na miiniu quiniutianiya taucua, Judiocuacano. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. ¹²Naacujitij, pueya jaara Pueyaso rootasano Moisés niishiashijiaca quiriquia, naajaa, nojori jaara sesa mijiaca quiri, nojoriiri saniitiosocoriquiano. Naajuhuj, pueya jaara Pueyaso rootasano Moisés niishijiaca quiriquia, nojori jaara na tojiyashijiaca quiquiaarijuhuaj, nojoriiri cuno Moisés Naajioneenjijini nequesoreesaanutaniya na tojitiaaquiniucua. ¹³Majaari nia jyaniniu niaari jyanooshaanutaniya sesa nia miishanojiniji nareja najuhua nia tojishacari Moisés Rootasano. Niaari

jiyanoyaquishaanutaniya maja seetanujuanaa na tojijiaca nia quiniucua. Noo pojori cutaraari jiyanooshaanutaniya, canapue te seetanujuanaa na tojjiacacua-jani. ¹⁴Moisés Rootasano jiitiaashijiaca pueya jaara tamajaaja maninia miiniu niishijiaca quiriquia, naacuaajitij, niishishiyari, nojoriiri tamajaaja maninia miiniu niishijiaca cutara. ¹⁵Naa maninia miiniu niishijiaca nojori quiniuucuatej, niishishiyari, Pueyaso rootasano Moisésri juhua nojori jiuujiajinia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinijia”. Naajuhua, nojori jaara maninia miiri, tama nojori jiuujiajaarijia nojori niishitiya: “Maninia miiriinijia”. ¹⁶Naacuaajitij, cuno juuca, Pueyaso nequesoreetesacari Neyanu Jesucristo puetunu mijiria quiníaa pueyajanaani, jiyacaritij, tama pueya jiuujiaari nojoriicua tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacuajani cua pohuatasacari Pueyaso rupaa Jesucristojiniji.

Pablo nacasusacari Judiocuaca nojori tojtiaaquiniucua Moisés Rootasano

¹⁷Cuarta Judio pueyanonaa, quiaari jiyaniya quíaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. ¹⁸Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuquiritiniuria”. ¹⁹Quiaari sequequiaajuhua: “Janiyacuaajari seetanu rupaajanaa niishiyashijiaca pueya niishitiojonani. Janiyari juhua ninishiqui quijiaca pueya cuhuatanani.

²⁰Janiyari niishiyashijiaca niishitiojojuani, naatujoorinio, maninia cua niishishacari seetanu rupaajanaa Moisés Naajioneenjijiji”. ²¹Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia mijia quia quiniuria. Quíaa jaara tamasaca niishitiojoquíaa maja na nohuasenuunura, ¿casaara nohuasejojua quia quiyacuaraarini? ²²Quia rootasacari tamasaca, maja nojori numuetucunura niyacaraca maa, ¿casaara saniniujia naa quia miiquiaa-cuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriquiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquíaa cuno casaa nojori secojonuuja tiacajinijicuaarini? ²³Quiaari sequequiaajuhua: “Moisés Rootasanoori jiyanojua maninia. Na timitiaanijia”. Naajaa, quiaari Pueyaso rerequetequiaa quia tojiyaquishacari Moisés Rootasano. ²⁴Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasoocua rimiaaquequiaa sacuaraatia, Pueyaso tojiyashijiaca nia quiniucua nojori niquiara”.

²⁵Cuarta Judiocuacanaa, Pueyasocua-jari pa supuetanaa rootaquiaari pa cararaatiuuquia co cuara miatesano quiiria, na saquiriojosano pueya pa quiniucua. Naacuaajitij, nia cararaatiuuquia co jaara miatesano quiri, cunoori maniniacuaja, niaa jaara seetanujuanaa Moisés Rootasano tojjiaca quiri. Saniniujia, niaa jaara Moisés Rootasano tojiyashijiaca quiriquia, niaari juhua miatesoo quiyajaa Pueyaso niquiara. Nia cararaatiuuquia coori najuhua miatesano quia. ²⁶Saniniujia, taucuaca jaara

maninia miijiaca quiri taa Moisés rootasano sequeyacuajani, mialesoo nojori cararaatiuuquia co quishacari, naajaa. Pueyasora, nojoriirí juhua mialesano quiya, na muerasu nojori quiniuria. ²⁷Naacuaajitij, na cararaatiuuquia co mialesoo tahue jaara maninia miijiaca quiri, taa Moisés Rootasano sequeyacuajani, nojuajaari jiyanooshanutaniya, Pueyaso muerasu na quiniuria. Quiajaniya saniniuuja Judio pueyano-naa, quiaari Moisés Rootasano niishijiacuaja. Quiaacuajaari quia cararaatiuuquia co mialesanoraca. Naajaa, quiaa cutaraari saniitiosanutaniya quia tojiyaquiniuucua Moisés Rootasano. Naacuaajitij, cuno tahueri quiocura tonujuriquiano saniya, Judio pueyanonaa. ²⁸Pueyasocuaajaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani? ¿Na cararaatiuuquia co mialesano pueyanotee, Judio pueyacuajinio supueo pueyanotejuhuaj? Maja. ²⁹Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojijia na quiniuria, cunoori juhua na cararaatiuuquia co mialesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3 ¹Naa cua sequesacari nijaniyatej, niaa naasucuaari sequeya: “Taucuaca jaara naa maninia miishaanutaniya nojori quiaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaararini?

¿Paateeri najuhuana Pueyaso saquiriojosano Judiocuacani?” ²Maja, Judiocuacanaa. Maniniacuajaari pa quishacari Judiocuaca. Pueyasocuaajaari Judiocuacaacia tiuquuaari nojori jiitianura na rupaa. ³Noojiaqueya Judiocuacajinijinio jaara Pueyaso Rupaacua tiuyashijiaca quiya, ¿Pueyaso-teeri cunora na rupaa jatanutaniyajuhuaj? ¡Maja! ⁴Puetunu pueyajanaa jaara sapojonuujuaa quiriquia, naajaa, Pueyaso cutaraari tojetaarucujanaa sapojiyashijia. Naaratej, nojuajiniijiri naa naajiotasano quiya tariucuaaana na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhuaj, pueya jaara quiocura tonujure juucua, puetunu nojorijianaari sanaajasaanutaniya, saa maninijia quia miiniuucua pueyaracaanu”.

⁵Pa supuetanaa tiuyaquiniuucua seetanu Pueyaso rupaacuajanaa, naacuaajitij, mijiria quiniaa pueyari niishiya, Pueyasoori socua jiyanohua maninia pueyajiniji. Sesa pa miiniujiniji, paari niishiyani Pueyaso cutaraari jiyanohua maninia. Naacuaajitij, nojuaja jaara pa saniitiore sesa pa miiniuucua, ¿taa naa sequeyani? ¿Nojuajate sesa, jaara pa saniitiore sesa pa miiniuucua? ¡Juaj! Juhua niishiyashijia pocuareenijia. ⁶¡Seetanujuanaa, Pueyasoori sesa miyashijia! Nojuaja jaara sesa miijiaca quiriqiajuhuaj, ¿maatucua taa mijiria quiniaa nequesoreereni?

⁷Tamasaca naasucuaari sequequiaa: “Sapojojua cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiitiaja. Naaratej, ¿Pueyasotucua casaara cua saniitioreni?” ⁸Teyano pueyanote naa sequejani, nojuaja naasucuaari naa sequejajuhuaj:

“Socua sesa pa miiri, Pueyaso jiyanooniuria pajaniya. Naacujitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhuanaj, canaanaari naa niishitiojoquiaani. Canapuate naa sapojonuquiaa canaacuarani, nojoriiri saniitiosaanutaniya, nojori sesacanuucua canaa.

**Pueyasora, puetunu pajaniyajanaari
sesa miijiacani**

⁹Quiarijia, jaara naa quiritij cuarta Judiocuacanaa, ¿paateeri socua maninia miijiaca taucucajiniji Pueyasorani? Maja. Janiyacujajaari shusha nia pohuatariquiaani, puetunu mijiria quiniaa pueyajanaari sesa miijiaca; Judiocuaca, taucucacanio. ¹⁰Tariucucaanu Pueyaso Rupaajiniacujajaari naa naajiotasano quiya:

“Majaari quenaaja niquiriyatu maninia miiji quiniu. Shaaqui tojetaarucujajanaa. ¹¹Majaari quenaaja maninia niishiriojojua pueyano quiniu. Majaari quenaaja Pueyasocua jiaatiaja pueyano quiniujihuaaj. ¹²Puetunu pueyajanaari Pueyasocujajitashuquoorucuaa. Puetunu nojorijianaari seserucuaa. ¿Cante maninia miijiiani? Shaaqui. Shaaqui tojetaarucujajanaa. ¹³Nojoriiri miananajonu maniniu. Nojori rupaari saa monujua. Nojoriiri na niti taquiriocueteja saa sapojonura. Cuno pojoriiri juhua soconu noonacu jiitiaa na rupaama, rimiaacatujuri nojori quiniuucua. ¹⁴Nojori jaara pocuare, saaja tamasa sesacaquiaari, puera juajia nojori quishacari. ¹⁵Nojoriiri puecojuaca. Puereeta nanaca shooteja. ¹⁶Puetunu mijiria nojori miishanojuanaari casaa

sesojua, narta pueya taraajetējaju-huaaj. ¹⁷Majaari nojori niishiniuijanooniui. ¹⁸Nojoriiri juhuajaniya miiquiaa sesa saaja. Majaari na pueretunu Pueyaso”.

¹⁹Paacujajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuacaruquiquiaari, nojori niishiniuria, puetunu pueyajanaari sesa miijiaca. Naacujitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijiaca; Judiocuaca, taucucacanio. ²⁰Naacujitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijiara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

**Paari Pueyaso jiyanooshano cutarani,
Jesuucua pa tiuushacari**

²¹Pueyasoori quiari naataja pa niishiti-quianu cutara, taate pa naata maninia miijiara pa jatanishaanuni. Moisés Rootasanojinia, tariucucaanu Pueyaso sequenu panishano caminiujinuaa naajionuutasanojiniaari naa sequeyaju-huaaj. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaca quiri. ²²Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucucacujuhuaaj, Pueyasoori puetunujuanaa jiyanooquiaa Neyanuucua nojori tiuushacari. Majaari rimiajata na jiyanooniui. ²³Puetunu pueyajanaari sesa miijiaca; Judiocuaca, taucucacanio. Naacujitij, nojoriiri juhua tuucacaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacujitij, pueyari Pueyaso timitiasoo quiquiaari. ²⁴Naajaa,

jiyanohua panijia Pueyaso quiniuucua, nojuajaari pa jiyanooquiaari Jesucristo cusunuucua pocuara. Naacujitij, Pueyasoori pa jiyatequiaari juhua sesa miyashijia. ²⁵Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacujitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhua, Pueyaso saniitioyaquishacari tariucuacaanu noca tiuujiaca pueya Jesu cusoyaquishacarijia, majaari najuhua puera jiuujiaajia na quiniu quiquiaari. ²⁶Pueyasoori niishiquiaari Neyanu Jesucristoori nojoriicua mosocoriquiano, sesa nojori miijiosano tuujusaanura seetanujanaa. Naaratej, nojuajaari pueyaracaanu sesa nojori miijiosano rejeretaquiaari saaja. Jesucristo cusunuucua quiari naataja pocuara, paari niishiyani, Pueyasoori seetanujanaa maninia miijia. Nojuajaari maja najuhua na na jiyanooni pajaniya. iNeyanu motequiaari pocuaraari!

²⁷¿Teyano niajanijajinijiniote tojetarucujanaa saaja maninia miijiani? Shaaqui. Naacujitij, maninia miyashijia ca pa quishacari, puetunu pueyajanaari sanaajasanutaniya Pueyaso nequesoreesacari pueya. Saniniuujia, paa jaara puetunu Moisés Rootasanojuanaa tojtijajaca quiriquia maniniani, paa maara tama pa cuaqueyajaaja shuquiritiajaca quiriquia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacujitij, majaari pa jiitianu tama pa miishanojuaaja pa shuquiritiasocoriquiano. ²⁸Naacujiti paari niishiyani, Pueyasoori pa jiyanoojia puetunu sesa pa miishanojiniijianaa saaja Jesucristoocua pa tiuushacari. Majaari na jiyanooni

pajaniya, Moisés Rootasano pa tojishacari.

²⁹¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocua jaari puetunu mijiria quiniaa pueyapuejanaa Jiyano. ³⁰Pueyasoori maja caapiqui. Nojuajaari saaja niquiriya tu. Naacujitij, majaari niquiriyatu Pueyaso quiniu Judiocuacaa, socua tamonu Pueyaso taucucara. Naaratej, puetunu pueyapuejanaari jiyanooshaa quiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucucanio. ³¹Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacujaari Moisés Rootasanojiniji niishiyani, paari sesa miijiacani. Naacujitij, Moisés Rootasanoori panishiya, pa niishiniuria paa cuara Jesucristoocua tiuuria, jiyanooshano pa quiniuria.

Pueyaso jiyatesacari Abraham juhua sesa miyashijia

4 ¹Naaratej cuarta Judiocuacanaa, ¿taa nia sequeya pa supuetana Abrahamjinijini? ²¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanooquiaari maninia na miiniuucua, nojuaja maara tama na cuaqueyajaaja timitiaja quiquiaari. ³Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji:

“Abrahamri Pueyasoocua tiuuquiaari. Naaratej, Pueyasoori na jiyatequiaari juhua sesa miyashijia”.

⁴Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niquitiojua. Jaara niquitiosaare, cuno

cumaneecaari maja nareja niqutiosano. Cunoori seetanujanaa na poonijiosanojiniji. ⁵Saniniuujia, maninia miyashijia jaara Pueyasocua tiuuri, Pueyasoori na jiyatenutaniya juhua sesa miyashijia saaja nocua na tiuuniuucua. ⁶Pa supueta-naa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niqiuara, maninia miyashijia pa quishacarijia. Naa naajiotasaaquiaariiri David sequesano:

⁷ “Shuquiriaatia quijiaca cutaraari noo pueya, canapue Pueyaso jiyanoaya sesa na mijiosanojinijicuaani, Pueyaso jaara tuujure sesa nojori mijiosanojuhuaj. ⁸Shuquiriaatia quijiacaari noo pueyajuahuaj, puetunu sesa nojori miishanojuanaa Pueyaso saneyaquishootej”.

⁹Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooni panijia, noo pojori canapuate na cararaatiuuquia co miatesano jiitiaani, taa nojori supueta-na Abrahamcuanaani? ¿Taa nia sequeyani? ¿Taucuacaarijiataj? ¿Nojoriti jiyanooshijajuahuaj? ¡Taaquiriirini! ¹⁰¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocuaajaari na jiyanooquiaari miatesoojua na quishacari. ¹¹Na tiuuni nuhuaji Pueyasocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasocua na tiuushacari, Pueyasoori na jiyatequiaari juhua sesa miyashijia, miatesoojua na quishacari. Naacujitij, miatesoo taucua tiuushacari Jesucris-

toocua, taa Abraham tiuquiaaricuaani, Pueyasoori nojori jiyateya juhua sesa miyashijia nojori quiniurajuhua, mariyata juhua Abraham niqiohua nojori quiniuria. Naacujitij, puetunu Pueyaso sequesano Abrahamjanaani, cunoori nojorirajuhua. ¹²Naajuhua, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niqiohua nojori quiniurajuhua.

Pueyaso sequesano Abrahamni, cunoori Jesucristoocua tiuuiacarajuhua

¹³Pueyasocuaajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaa quiquiaari Moisés Rootasano tojjia na quiniuucua. Jiyacari-tij, Moisés Rootasanoori maja na quiniu quiquiaari juhuanojuaja. ¹⁴Pueyaso sequesano Abraham jaara saaja Moisés Rootasano tojjiacara quiri quia, na sequesano maara najuhua quiri Pueyasocua tiuuiaca pueyara. Naajuhua, pueya maara najuhua Pueyasocua tiuuiaca quiri quiajuhuaj. Seetanujanaa Pueyaso sequesano Abrahamni, cunoori puetunu Pueyasocua tiuuiacarajanaa. ¹⁵Cunoori maja saaja Moisés Rootasano tojjiacara. Pueyasocuaajaari niishiquiaari, pueyari maja na naata Moisés Rootasano tojinu quiniutianiya puetunujuanaa. Moisés Rootasanojiniji, paari niishiyani, paari saniitiosaanutianiya ni pa tojjitaaquiniuucua cuno rootasano. Saniniuujia, Moisés Rootasano jaara quiaquiri quia, pueya maara sequeyaquishaare: “Niaari sesa mijia”.

¹⁶Pueyasoori tariucuaaanu na sequesano Abraham nareja niquitionu paniquiaari, puetunu necohuarajanaanio. Naaratej, seetanjuanaa pa masenura na sequesano Abraham, Pueyasoori sequequiaari, nojuajaari nareja na niquitionutaniya nocua tiuujiaca. Naacujitij, Pueyaso sequesanoori maja saaja Moisés Rootasano tojijiacara. Cuno sequesanoori puetunu pueyapuerajanaa, canapuee Pueyasooocua tiuujiaca quiyani, taa Abraham quiquiaari Pueyasooocua tiuujiacuaani. Naa Pueyasooocua tiuujiaca pa quishacari taa Abraham tiuuquiaari Pueyasooocuaani, paari Abraham niquiohuani. Naaratej, Pueyasora, Abrahamri pa que. ¹⁷Pueyasocuaajaari naa sequequiaari Abrahamtej nojuajaari queraatia niquiohuaraca quiriquiano. Naacujitij, Pueyaso sequesanoori naa naajiotasano quiya:

“Abrahamnaa, janiyari quiarijia quia jiyateree queraatia tamaatia rupaaca pocuajaca que quia quiniuriani”.

Abrahamri Pueyaso sequesanoocua tiuuquiaari. Nojuajaari niishiquiaari Pueyasoori macunucua samiitianijia. Niishiquiaariiaariuhua, Pueyasoori cumaacaraca na panishano na shipinioria shaaquijiniji.

¹⁸Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuuquiaari. Naacujitij, nojuajaari seetanjuanaa queraatia tamaatia rupaaca pocuajaca pueyapue que, taa Pueyaso sequequiaari nojuacuaani. Pueyasoori naa na sequequiaari:

“Quia niquiohuari tojetaarucuaajanaa queraatia quiriquiano”.

¹⁹Naa Pueyaso sequesacari nojuajatej, nojuajaari tari cien* marijia shocotejoquiaari. Naa saaquiano na quishacaritij,

necocua Saarajuhua, naajaa, majaari na tarinitianu quiquiaari Pueyaso sequesanoocua tiuuniu. ²⁰Saaja Pueyaso sequesanoocua na tiuushacari, nojuajaari maja noojia na niquijiotenu quiquiaari. Majaari Pueyaso sequesanojiniji na taacanuunu quiquiaarijuhuaj. Saaja Pueyasooocua na tiuushacari, nojuajaari noojia cumaquiquiaari socua. Naacujitij, nojuajaari naa maniniuhuaqueetaquiaari Pueyaso: “Paacarasho cua Pueyasonaa. Niishiyanjia quiaari canaa muetutenutaniya taa quia sequecanu janiyacuaani. ²¹Quiaacuaajaari cumaacaraca quia miiniuria puetunu quia sequesanojuanaa”. ²²Naa Abraham tiuuniuucua Pueyasooocuatej, Pueyasoori na jiyatequiaari juhua sesa miyashijia pueyanora.

²³Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijia”, cunoori maja saaja Abrahamra sequesano. ²⁴Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhua, nocua pa tiuushacari, pa niishishacarijuhuaj nojuacuajaari pa Jiyaniijia Jesucristo samiitianiquiaariuhua macujiniji. ²⁵Pueyasocuaajaari mijiria na jiyaroquiaari sesa pa miishanoocua mosocoriquiano. Nojuajaari na samiitianiquiaariuhua, Jesu jaatianura nocua pajaniya, juhua tariucua sesa miyashijia-ca.

Jesuucua tiuunaa pueyari jiyanooshano

5 ¹Naacujitij, paa jaara tari jiyanooshano quiyani Jesucristoocua pa tiuushacari, paari juhuajaniya quiya Pueyaso niqiarani. Jesucristoori na Que pa jiyanootiquiaari, pocuara na cusocari. ²Jesucristoocua tiuujiaca pa quishacari, Pueyasoori pa timitiaquiaa. Pa cumaquiquiaajaariuhua maninia

necohua pa quiniuria. Paari shuquiriya-jaacuhua, pa niishishacari paari jatanishaanutaniyani, shacantuuca quijiaca pa quiniuria juhua nojuajuhua. ³Majaari saa cunojua. Paari shuquiriquiaajuhua, paa jaara taraatia miishaareni. Paacuaajaari niishiyani, paa jaara naquiya miishaareni, paari socua juhuajaniya rejeretajaca quiniutianiyani. ⁴Naa rejeretajaca pa quishacaritij, paari cumueeca Pueyaso muerasu quiniutianiyani. Naa cumueeca Pueyaso muerasu pa quishacaritij, paari juhuajaniya sashijaca quiniutianiyani, pa niishishacari Pueyasoori seetanujuaanaa maninia miiniutianiya pajaniya, taa na sequequiaaricuajani. ⁵Naa pa niishishacaritij, majaari sapojosano pa quiniu quiniutianiya. Pueyasocuaajaari tari jiyaroquiaari na Sohanu, poojiajinia quiriquiano, seetanujuaanaa Pueyaso paniniu pa jiitianura poojiajinia.

⁶Pueyaso tojiyashijaca pa quishacarijia, majaari pa naata quiquiaari Pueyaso jiyanoootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanoootiniuria pajaniya. ⁷Sesa miyashijia pueyano jaara monu panishiya juucua, ðtamonu maninia pueyanoteeri quiya na sequenura: “Janiya cuaara mosaaria juhuari cuno pueyano niti”? Majaruhua. Monu panishano pueyano jaara seetanujuaanaa maninia pueyano quiri, na rupeua pueyano jaara jiyanoehua na panijia quiri, nojuaja maara sequere: “Janiya cuaara na niti mosaaria juhuari”. ⁸Saniniuujia, sesa mijiaca pa quishacarijia, Jesucristoori pa niti cusoquiaari cutara. Naacujitij, paari niishiyani, Pueyasoori jiyanoehua pa panijia. ⁹Quiarijia, paari sesa miyashijia-ca quiya Pueyaso niquiarani, Jesucristo cusunuuca pocuara. Naacujitij, paa cutaraari niishiyani, Pueyaso saniitiosacari na tojiyashijaca pueya, Cristoori

pocuaiji tacunutaniya cutara, tariucua na jatanishano pueya pa quiniuucua. ¹⁰Na paraa pa quishacarijia, Pueyasocuaajaari pa jiyanoocuaajaari, Neyanu cusunuuca pocuara. Quiarijia, nata jeecatoono pa quishacari, Neyanuuri saminio quiya pueyaracaanu pocuaiji na tacunura.

¹¹Majaari saaja cunora shuquiriaatia pa quiniu. Paari shuquiriyajuhua, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹²¿Casaara pa cusunuuquiaani? Juhucatecara pa supuetana Adán miiniuucua sesa, naaratej puetunu pueyajanaari sesa mijiicajuhua. Pueyasocuaajaari tari sequequiaari: “Cante sesa mijiiani, cuaara shaajeera”. Seetanujuaanaa naari. Puetunu pajaniyajanaari shaajeriquianoni, sesa mijiaca pa quiniuucua. ¹³Moisés Rootasano quiaquishacarijia, pueyari tari sesa miiniu niishijia quiquiaari. Jiyacaritij, pueya miishacari sesa, majaari nojoriicuara saquiriojotasaanu quijia sesa nojori miishacari. ¹⁴Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesanoocuaani. Naajaa, puetunu nojorijianaari cusunuuquiaarijuhuaj sesa mijiaca nojori quiniuucua, sesa mijiaca Adáncuajinio nojori supuenucua. Quiarijia saniniuujia, nia pohuatareera Adán miishanojiniji, Jesucristo miishanojinijinio.

¹⁵Adán miishanoori jiyanoehua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniuujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijia nojori quiniuria

cutara. ¹⁶Pueyaso miishano maninia pajaniyarani, cunoori sesa Adán miishano shocotaa jiyanoohua cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniuujia, maninia Jesucristo miiniuucua pajaniyarani, Pueyasoori pa jiyanoohua puetunu sesa pa miishanojiniijianaa. ¹⁷Niquiriyatu pueyano miiniuucua sesa, puetunu pueyajanaari cusonuujacara quiquiaari. Saniniuujia, niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiuushacari. Majaari saaja cuno, naajuhua, paari shuquiriaatia quijia jiyaniijianucua quiniutianiya maniniushi-quini, Jesucristo rupesano pa quishacari.

¹⁸Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa mijiacara, saniitosano nojori quiniuria. Naajuhua, Jesucristo miiniuucua maninia, puetunu pueyajanaari na naata jiyanooshaanu, nojori saniitioyaquishaanuucua, pueyaracaanu quijia nojori quiniuria. ¹⁹Adán tojiyaquiniuucua Pueyaso sequesano, puetunu pueyajanaari sesa mijiacara jiyatesaaquiarijuhua. Saniniuujia, Jesucristo tojiniuucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquihua.

²⁰Moisés Rootasano jaara niishishaa-quiaari, pueyari socua sesa mijiacara jiyatequiaari. Naa socua sesa mijiacara pa quishacaritij, naajuhua, Pueyasoori socua jiyatequiaari pocua taraajenujuhuaj. ²¹Sesa miiniu tarinitianu niishiyashijia pa quiniuucua, puetunu pueyajanaari cusonuuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo

motequiaari pa niti, pa jiyanooshaanura. Naacujitij, nojuajaari juhua pa samiitianijioquiaariuhua, pueyaracaanu rishijiaca pa quiniuria pa Jiyaniijia Jesucristota.

Pablo niishitiojosano moojinia tiuquinijionujiniji

6 ¹Pueyaso jaara naa pa jiyanoohua pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miji quiniutianiya, pueyaracaanu Pueyaso jiyanooniuria pajaniya, pueya niishiniuria, Pueyasocua-jaqui jiyanoohua maninia na jiyanooniuria pajaniya? ²iMaja pueyanaa! iMaja nia nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miji quini? Pueyasora, paacujaaari tari cusonuquiaari Jesutani. ³¿Niaateeri cuno niishiyajuhua? Naajuhua, paa jaara moojinia tiuquinishaare Jesucristoocua pa tiuushacarini, Pueyaso niqiaara, paari Jesu rupuequiaari niyacutesanojiniani. Nojuacujaaari pa niti saniitiosaaquiaari. ⁴Naacujitij, paa jaara moo cariquimia shishaareni, jiyacaritij, paari juhua Jesuta jamoshiyajuhua. Naa juhua macu pa quishacaritij, paari samiitianijiosanohuani, taa Jesucristo samiitianishaquiaariuhua macujiniji jiyanoohua Pueyaso cumacatacuani. Naa samiitianijiosanohua pa quishacaritij, maninia mijiaca pa quiri juhua quiarinio pueya.

⁵Paa jaara Jesucristo rupuetesaaquiaari sesa pa miishanoocuara na cusosacarini, naajuhua, paa cutaraari tari samiitianijiosanohua juhua nojuajani, maninia quijia pa quiniuria. ⁶Tarijia, majaari pa naata tarinitianu quijia sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa

tiuushacari, maja socua cumaaca na jiitianura, sesa na miitiniuria pajaniya. ⁷Naacujitij, sesoriquia poojia seque jaara tari jatanishano quiya, majaari tari sesa miijiaca pa quiniu. ⁸Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. ⁹Cristocua-jaari samiitiaquiaariuhua. Paari niishiyajuhua, majaari socua na pacutenu quiniutianiuhua cusun. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. ¹⁰Majaari socua Jesucristo pacutenu quiniutianiuhua cusun, sesa pa miishanoocua. Nojuacuajaari tari cusoquiaari, Pueyaso jiyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹Naajuhua pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijiuhua, niaacuajaari Jesucristota samiitiaconohua, Pueyaso tojijiaca nia quiniuria.

¹²Naaratej pueyanaa, majaari nia shanacunu sacuaraatia nioojia seque niishiriojosano nia miiniuria. Seetanujua-naa nia nijayetare tama nia cuaqueya panishanojuaja nia miyaquiniuria. ¹³Majaari nia cuaqueya nia panitianu sesa nia miiniuria, taa na paniya nia miiniuria juucuacuajani. Saniniuujia, nia cuaqueya nia jiyatere cutara saaja Pueyaso panishano miiija na quiniuria. Niaacuajaari tari samiiticoquiaariuhua juhua macunucua nia quiniujiniji. Naacujitij, nia cuaqueya nia jiyatere saa maninia miiija na quiniurija. ¹⁴Niaa jaara nioojiajinia cuno sesa niishiriojosano ruuretajaca quiri, niaari na

shocotanutaniya, Pueyaso cumaquishacari niajaniya. Nia niishiri, niaari quiarijia Pueyaso tojtiajaca cutara, maja tari Moisés Rootasano tojijiaca.

Pueyaso tojiyashijiaca pueyani, nojoriiri Sesaaca pueya

¹⁵Cua sequesacari niajaniya, pajaniya maja tari Moisés Rootasano tojijiacani, ¿niaateeri cunora sesa miiniutianiya, Pueyaso quishacari pa jyanoojia? ¡Maja naa nia miiniu pueyanaa! ¹⁶Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacujitij, paari pueyaracaanu na tojijia quiniutianiyan. Naajuhua, niaa jaara sesa miijiaca quiriohua, niaari Sesaaca tojijiaca. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojjiacara quiri, niaari sesa miyashijiaca quiniutianiya. ¹⁷Tarija, niaari Sesaaca tojjiaca quijia, juhua na seya, sesa miijiaca nia quishacari. Quiarijia, janiyari Pueyaso timitiaani nia tojiniucua Jesucristo rootasano puetunu nioojiatajanaa, taa nia niishitiojosaaquiaaricuajani. ¹⁸Jesucristo rupaa nia tojishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacujitij, niaari Pueyaso tojjiacara jatanishano, saaja maninia miijiaca nia quiniuria. ¹⁹Janiyari naa pohuataa serujiniji niajaniyani, maatia nia tojiniuria cua niishitiojosano. Majaari juhuanajuaja nia naata puera jiyajeneta niishitiojosano niishiniu, cumueeca Pueyaso muerasu nia quiaquishacarijia. Tarija, niaari tama nia cuaqueyajaaja jiyatequiaari Sesaaca panishano nia miiniuria. Naacujitij, niaari jyanohua sesa mijiacara jiyatequiaari. Naajuhua, quiarijia saniniuujia, tama nia cuaqueyajaaja nia jiyatere Pueyaso panishano nia miiniuria. Naa

jaara naa miiri, niaari tojetaarucujanaa maninia miijiaca quiniutianiya Pueyaso-ra.

²⁰Niaa jaara sesa miijiaca quiquiaarijia Sesaaca tojjijia nia quishacarijia, niaari juhuajaniya Pueyaso tojiyashijia quiquiaari. ²¹¿Sesaacate maninia nia miiquiaari sesa nia miiniucua nera? ¡Maja! Niaa cutaraari saaja caririquiquiaa sacuaraatia casaa nia miiniucua tarijia. Niaari quiarijia niishiyajuhua, cante sesa miijiaca quiquiaani, nojoriiri shaajasaari-quiano. ²²Naa sesa miyashijia nia quishacari quiarijia saniniuujia, niaari Pueyaso tojjijacara jiyatesaaquiaari, saaja na panishano nia miiniuria cutara. Naa Pueyaso tojjijaca nia quishacaritij, nojuajaari nia jiyatenutaniya seetanujua-naa maninia miijiaca nia quiniuria. Naacujitij, niaari pueyaracaanu shuquiriaatia rishijia quiniutianiyajuhua. ²³Saniniuujia, sesoriquia pueya miiniucua sesa saaja, nojoriiri naa na miiniucua shaajasaanutaniya. Saniniuujia, saaja Jesucristoocua tiuujia pa quishacari, Pueyasoori saa cunoraja pa jiyatequiaa pueyaracaanu rishijia pa quiniuria, pa Jiyaniijia Jesucristo rupuejaca pa quishacari.

Paari juhua camishanoni

7 ¹Pueyanaa, niaacujaari Moisés Rootasano niishijia. Niaari niishiyajuhua, paa jaara shaajequeeni, paari jiyacari Moisés Rootasano cartequa shushani. ²Naajuhua, paacujaari rootasaaquiarini, maaji jaara camishano quiri, cuaara tamonu cayata quiyaquiri, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniuno cuno mashiquio tojishocoriquiano. ³Saniniuujia, maaji jaara tamonu pueyanota quiri quia neyaca quishacarijia saminio, cuno maajiiri sequeshiya

paanatuta, naa na quiniucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniuno cunora. Nojuajaari maja paanatu, naa na miishacari.

⁴Niaari naajuhua pueyanaa. Jesucristo cusuucua pa niti, niaari juhua cusuucuaquiariniuhua, maja Moisés Rootasano tojjijaca nia quiniuria socua. Naacujitij, niaari tamonu tojjijaca quia cutara. Nojuajaari pa Jiyaniijia Jesucristo, noj, macujiniji samiitaquiariniuhua. Naacujitij, quiarijia pa Jiyaniijia Jesucristo tojjijaca pa quishacari, paari maninia miijiaca Pueyasorani. ⁵Tarijia, Pueyaso tojiyashijia pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuquiaari sesa pa miiniuria. Naacujitij, tama sesa pa miishacarijaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. ⁶Tarijia, paari juhua quioosano pueya Moisés Rootasano tojitishaaquiarini. Saniniuujia, Jesucristota pa cusuucua, nojuaja jaara pocuara cusuquiaari, paari tari Moisés Rootasano tojinu cartequiarini. Moisés Rootasano pa tojiyaquishacari quiarijia, naacujiti pa naata Pueyasojuanaa tojinu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitijaca quiquiaari maniniani, pa puerenuta paa mariqui saniitosaaereeri pa tojiyaquiniucua niquiriyatu queraatia na rootasanojiniji.

Poojiaari saa sesa miini niishijia

⁷Tamasaca naasucuaari jiyaniya janiyari Moisés Rootasano soojeani.

Maja. Quiria, jiyanohua maniniacuaajaari Moisés Rootasano. Moisés Rootasanojiniji, paacuaajaari niishiyani paari sesa miijiacani. Moisés Rootasano jaara quiaquiriquia, janiya maara niishiyaquiquiaarini, cua jiaatiasacari tamasaca jiitiasano casamiicua, cunoori sesa Pueyasora. ⁸Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaaquiaarini casamiicua jiaatiaja cua quiniuria socuani. Naacujitij, Moisés Rootasano cua niishiyaquishacarijia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. ⁹Moisés Rootasano cua niishiyaquishacarijia, janiyari juhuajaniya quijia quiquiaarini. Saniniuujia, Moisés Rootasano cua niishishacari, janiyari jiyanohua taraajequiaarini, cua niishishacari janiyari jiyanohua sesa miijia Pueyaso niquiarani. ¹⁰Naa sesa miijia cua quishacaritij, janiyari niishiquiaarini, janiyari quera jatashiya saniitosocori-quianoni. Janiya jaara Moisés Rootasano tojiqiaari shushajanaani, janiyari jiyaniquiaarini, janiya jaara cunoori rootasano tojirini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijijianaa. ¹¹Naacujitij, janiyari jiyanohua jiyajenequiaarini, cua jiyanishacari cua naatacuaja Moisés Rootasano tojinu maninia, Pueyaso jiyanooniuria janiya. Jaara maja cua naata quiquiaari Moisés Rootasano cua tojinuria maninia, janiyari niishiquiaarini Pueyasoori cua jiyanoyaquiniutianiya.

¹²Seetanujanaa nia sequeyanijia pueyanaa, Moisés Rootasanoori

jiyanohua maninia. Tojetaarucujanaa maninia rootasano. Cunoori seetanujanaa rupaa maniniu Pueyasojiniji.

¹³Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jiyanohua sesa Pueyasora. Naacujitij, paari Moisés Rootasanojiniji niishijiani, paari puetunujanaa jatasocoriquiano quijia juucuan, seetanujanaa sesa miijia pa quiniucua.

¹⁴Paacuaajaari niishiyani, Moisés Rootasano, cunoori maja nareja pueyano niishitiojosano. Pueyaso niishitiojosanocuaajaari pa tojishocori-quiano puetunu poojiatajanaa. Saniniuujia, coojiaari Pueyaso tojiyashijia. Janiyari tamajaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojinu.

¹⁵¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. ¹⁶Janiya jaara cua panishoo sesa casaa miirini, naacujitij, janiyari sequequiaani, Moisés Rootasanoori seetanujanaa maninia.

¹⁷Naa cua panishoo sesa casaa cua miishacaritij, cunoori maja tama cua miishanojuaja. Cuno sesa cua miishanoori coojiajiniji supueno tamajaaja. ¹⁸Quiarijia niishiya cutaranijia, coojiaari tojetaarucujanaa sesa miiniu niishijia. Naacujitij, janiyari juucua maninia miiniucua jiaatiaquiaani. Naajaa, majaari cua naata quiquiaa maninia cua miiniuria tamajaaja.

¹⁹Naacujitij, cua miishanoori maja maninia, taa cua miiniu paniquiaa juucucuaajani. Cua miishanoori saaja cua miiniu paniaquishoo quiquiaa.

²⁰Naacujitij, janiya jaara cua panishoo

sesa casaa miirini, janiyari niishiyani, cunoori tama coojajiniji supuenojuaaja, majaari tama cua miiniu panishanojuaaja.

²¹Quiarijia niishiya cutaranijia, janiyari naa sesa miiijani: janiya jaara maninia casaa miiniu paniyani, janiyari saaja sesa miiquiaani. ²²Janiya cutaraari niishiyani Pueyaso rootasano Moisésri seetanujuaana maninia cua tojishocoriquiano. Na tojiniuucua jiaatiaquiaa juucuanijia. ²³Janiyari niishiyaaniuhuj, coojiaari juhua cua niishitija paraca quiya. Naacujitij, cua niishiriojosacari, “Maninia miiniutianiyani”, coojiaari saaja sesa cua miitiquiaa. Naacujitij, tama janiyajaarjia juhua coojia seruni, cua miishacari puetunu sesa na panishanojuanaa.

²⁴¿Taa cua miiniutianiya socuaarini? ¡Tojetaarucujanaa tاراtia quijianijia! Pueyaracaanu sesa miijianijia. Majaari cua naata tamajaaja maninia miiijia cua quiniu. Naa sesa miiijia cua quishacaritij, cua cuaqueyari macu quiriquiano. ¿Cante na naata cua jataniniuni, naa sesa miiijia cua quishacaritij? ²⁵¡Pueyaso shuquiritiaanjia cua niishishacari, nojuacujaari cua Jiyaniijia Jesucristota cua jataniniutianiya tojetaarucujanaa maninia miiijia cua quiniuria! Naacujitij, mijiria cua quishacarijia, janiyari Pueyaso tojjijia quiniu paniyani. Saniniujia, naa coojia quiniuucua sesatej, saaja sesa cua miitiniu paniquaari.

Pueyaso Sohuanu pa tojishacari, paari maninia miiijia quiniutianiyani

8 ¹Pa rupesacari Jesucristo, nocua pa tiuushacari, Pueyasoori pa jiyanoquiaa. Naacujitij, paari tojetaarucujanaa jiyanooshano quiyani. ²Puetunu pueyajanaari cusunuriquiano quijia, sesa miiijia nojori quishacari. Saniniujia, Jesucristo pa rupesacari,

Pueyaso Sohuanuuri pa jiyatequiaa saaja maninia miiijia pa quiniuria. Naacujitij, majaari tari sesa miiijia pa quiniu pa saniitiosaanura. ³Moisés Rootasano pa tojishacari juucua, majaari pa naata quiniu jiyanooshano. Cunoori saaja sesa miiijia pa quiniuucua. Naaratej, Pueyasoori Neyanujuaana jiyaroquiaari mijiria, pueyano na quiniuria juhua pajaniya, pa niti na mosaanura. Naacujitij, Jesucristo jiitiasacari juhua pa cuaqueyajuhuj, Pueyasoori juhua sesa miiijia na jiyatequiaari, pa niti na saniitiosocoriquiano. ⁴Naacujitij, Pueyaso Sohuanu pa jiitiasacari quarijia, pa naata maninia miiijia quiniu, taa Moisés Rootasano sequeyacuajani. Pueyaso Sohuanu tojjijia pa quishacari, majaari tari pa quiniu sesa miiijia, taa pa quiquaari tarijacuajani.

⁵Canapuate tama na panishanojuaaja miiquiaani, nojoriiri tama na cuaqueyajaaja shuqiritiniuria jiaatiaquiaa. Saniniujia, canapuate Pueyaso Sohuanu tojjijia cutarani, nojoriiri saaja Pueyaso shuqiritiniuria jiaatiaquiaa. ⁶Tama na cuaqueyajaaja shuqiritiniuria jiaatiajaacaari saaja shaajecoriquiano cutara. Saniniujia, Pueyaso shuqiritiniuria jiaatiajaacaari pueyaracaanu rishiriquiano cutara. Nojoriiri juhujaniya shuquiriaatia quijiacajuhuj. ⁷Cante tama na cuaqueyajaaja shuqiritiniuria jiaatiaquiaani, nojuajaari Pueyaso paraca. Majaari Pueyaso tojjijia na quiniu paniniu. Seetanujuaana majaari na naata Pueyaso tojjijia na quiniujihuj. ⁸Naacujitij, canapuate saaja tama na cuaqueyajaaja shuqiritiniuria jiaatiaquiaani, cuno pojoriiri maja na naata Pueyaso shuqiritiniu.

⁹Niajaniya cutaraari maja nia quiniu juhua cuno pojorijia, tama na cuaqueyajaaja shuqiritiniuria jiaatiajacani. Naa cutaraari Pueyaso shuqiritijia,

Pueyaso Sohuanu cumaquishacari niajaniya, nojuaja jaara seetanujanaa nioojiajinia quiya. Cante Pueyaso Sohuanu jiitiaaquiyani, nojuajaari maja Pueyaso pueyano. ¹⁰Cristo quishacari poojiajinia, pa sohuanuuri tari jatanishano quiya maninia miijiaca pa quiniuria, pueyaracaanu rishijiaca pa quiniuriajuhuaj. Pa cuaqueya cutaraari shaajasocoriquiano, sesa miijiaca pa quiniuucua. ¹¹Naajaa, Pueyaso Sohuanu jaara poojiajinia quiya, nojuajaari pa cuaqueya samiitianijionutaniuhua, taa na samiitianiquiaariuhua macujiniji Jesucuaani.

¹²Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa miiquiaari tarijiacuajani. ¹³Cante naa miijiaca quiyajaani, nojoriiri shaajasaariquiano. Saniniuujiya, niaa jaara Pueyaso Sohuanu cumaacata rejeretariquia saaja tama sesa nia cuaqueya miiniu panishanojuaja, niaa cutaraari pueyaraaanu shuquiriaatia quijiaca quiniutianiya.

¹⁴Canapute Pueyaso Sohuanu tojitiajani, nojoriiri Pueyaso niquiohua cutara. ¹⁵Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacujitij, cuno pa jiitiasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojiyaquiniuucua. ¹⁶Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. ¹⁷Naa Pueyaso muerasu pa quishacaritij, puetunu Pueyaso jiitiasanojuanaari pa jiitiasano quiniutianiyajuhua. Pueyasoori Neyanu Jesucristota pa cojiritianutaniya naa

maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuuijaca pa quiniuucua. Paa jaara naquiya miishaare nocuara mijiriani, paari jiyanoehua maninia quijiacara jiyatesaanutaniyani juhua nojuajuhua.

Pueyasoori maninia miiniutianiya na muerasu

¹⁸Quiarijia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanoehua maninia miishaanutaniyani, pueyaracaanu shuquiriaatia pa quiniuria.

¹⁹Quiarijiani, puetunu Pueyaso shipinishano casaajanaari pa niquiniuucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucasano na muerasu pa quiniuria. ²⁰Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijiosano casaajanaari sesequiaarijuhuaj. Majaari na sesenu quiquiaari tama na panishacarijiaaja. Pueyasocuaajaari naa paniquiaari sesa na quiniuria, na shipinishano pueya sesenucuajuhua. Naajaa, majaari pueyaracaanu sesa na quiniu quiniutianiya. ²¹Pueyaso muerasu jaara jatanishaare shacantuca quijiaca pa quiniuria, jiyacaritij, puetunu Pueyaso shipinijiosano casaajanaari pata cojiritiasaanutaniya jeecanujuhuaj. Naacujitij, puetunu Pueyaso shipinijiosano casaajanaari maninaria quiniutianiuuhua, maja na sesenura socua. ²²Quiarijiani, puetunu Pueyaso shipinijiosanojuanaari jiyanoehua noojia niojiya taraatia na quishacari. Quiatojiyari juhua maaji noyano, cuara quiariniora jatanishaarejaatijia. ²³Majaari

saaja puetunu Pueyaso shipinishano casaajanaa quiatojonu, poojiaari juhua quiatojiyajuhua, na panishacari tojetaarucuaajanaa jatanishano quijiaca pa quiniuria. Paacuaajaari tari jiitiaa Pueyaso Sohuanu poojiajiniani, pa niishiniuria, paari seetanujuanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiya-jaani. ²⁴Paacuaajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaaquirini. Paa jaara tari jiitariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵Naajaa, paacuaajaari niishiyani pa cuaqueyari jatanishaanuta-niya, jiyocuacaanu pa rupuenura pa Jiyaniijia. Cunora, paari mijiria taraatia pa quishacari juhujajaniya rejeretaquiaani pueyaracaanu pa sashishacari.

²⁶Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacujitij, Pueyaso pa secojosacari, pa niishiyaquishacari casaacuara pa secojonutaniyani, Pueyaso Sohuanucuaajaari poojiajiniji Pueyaso secojoquiaa pocuara. Jiyanhua na secojosacari pocuara, jiyasohua quiatojiya poojiajiniaari. ²⁷Poojia niishijia Pueyasoni, nojuajaari niishiyacuaja casaa na Sohuanu secojiya nojuaja pocuarani. Na Sohuanucuaajaari maninia secojojua cutara, taa Pueyaso miiniu paniya na muerasuracuajani.

Jesucristo pa shocotanijia cutara

²⁸Paacuaajaari niishiyani, paa jaara maninia miishaareni, paa jaara sesa miishaarejuhuaj, Pueyasoori puetunu

cuno miishanojuanaa jiyatequiaa saaja maninia na quiniuria na panijiacara. Nojuacuajaari pa saquiriojoquiaari na muerasuniyojua pa quiniuria. ²⁹Naajuhua, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuaj. Naa sequequiaariiri Jesucristo quiniuria pa puerana, queraatia tapueyocucaraca na quiniuria. ³⁰Naacujitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhua, Pueyasoori cuno pojori niishitiquiaa nojori tiuniuria Neyanuu-cua. Jesucristoocua nojori tiuushacari, Pueyasoori nojori jiyatequiaa juhua sesa miyashijiacara. Jiyanooshano nojori quishacari, Pueyasoori nojori niquitioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja!

³²Pueyasoori jiyanhua pa panijia.

Nojuajaari Neyanuniyojua jiyaroquiaari pocuara mosocoriquiano. Nojuaja jaara Neyanu jamueyaquiquiaaricuaa, ¿maatucua casaara quiarjia niquitioyaquiri puetunu pa panishanojuanaani?

³³¿Cantucua Pueyaso saquiriojosano pueyacuara saquiriojotare sesa nojori miishanoni? Pueyasojuaacuaajaari pa jiyatequiaari juhua sesa miyashijia pa quiniuria. ³⁴Jesucristocuaajaari tari cusoquiaari pa niti. ¿Cantucua saniniujia quiarjia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samiitiaquiaarihua. Quiarjia na Que Pueyaso miaquetajara cajiari, pocuara na Que na secojonura pueyaracaanu. ³⁵Nojuajaari

jiyanohua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniniu Cristo pa paniyaquiya, paa jaara tاراatia miishiyani, paa jaara casaacua tacayani, tamasaaca jaara naquiya miya pajaniyani. Naajuhuaaj, paa jaara quera titiacoya pa miaajenutani, majaari nia jiyaniniu Cristo pa paniyaquiyani, naajuhuaaj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuaaj. Puetunu niojuanaari maja na tarinitiniu Jesucristo, na paniyaquiniuria pajaniya. ³⁶Paacuaajaari tاراatia miishocoriquianoni, naatej, taa tariucuacaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniucua. Nojoriiri juhua miaquesocoriquiano borregohua canaa puecooquiaa juhuajaniya”.

³⁷Paari naa miishaaquiaaaniuhuaaj. Naajaa, naa tاراatia pa miishacaritij, Jesucristo panishacari pajaniya, nojuajaaari shocotajacara pa jiyatequiaa. Naacuaajitij, majaari saaja pa rejeretanu naquiya pa miishacari. Jesucristoori seetanujanaa cuno naquiya pa miiniu jiyatequiaa maninia na jeeanura pajaniya, juhua nojuaja pa quiniuria socua. ³⁸Seetanujanaa niishiyanjia, Pueyaso panishacari jiyanohua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiojuani, macu soj, naajaa, pa panijia Pueyasocuaajaari pata quiyajaa. Naajuhuaaj, Pueyaso seya, samaruhanio, puetunu cunojuanaari maja na naata pa rupatanu Pueyasoo cuaji. Naajuhuaaj, majaari quenaaja tamonu cumaacaraca

quijiaca na naata pa rupatanu Pueyasoo cuaji. Pueyaso paniniu pajaniyani, cunoori maja na puequenu quiniutianiya quiarijia, tamacarinio. ³⁹Naajaariuhuaaj, tee pa quiyani, jiyocuacaanu, jiya cariquimia soj, naajaa. Pa panijia Pueyasoori tii quiya patajuhuaaj. Naacuaajitij, pa Jiyanijia Jesucristota rupuetootesano pa quishacari, puetunu Pueyaso shipinijosano casaajanaari maja na naata pa rupatanu Pueyasojiniji.

Pueyasojunaari pueya saquiriojoja na pueyara

9 ¹⁻³Naa Pueyaso pueyano cua quishacaritij, janiyari jiyanohua cuarta Israel pueyacia tاراajequiaani, nojori tiuyaquiniucua pa Jiyanijia Jesucristoocua. Janiyari pueyaracaanu nojoriicua tاراajequiaa jiyanohuani, maja cua naata quishacari cuarta Israel pueya tiuutiniu Jesucristoocua. Seetanujanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniacuaajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”. Naa cua sequesacari niajanijatej, janiyari coojiajinia niishiyani, seetanujanaari cua sequesano. Pueyaso Sohanuuri cua niishitiyajuhuaaj majaari cua sapojonu. ⁴Cuarta Judiocuacaari pa supuetana Israel niquiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiuushacari. Pueyasoori nojori niquitiquiaari shacantuuca na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuaajaari Pueyasoni. Niaari cua pueya quiniutianiya niaa jaara

cucua tiuuri”. Naajuhuj, Pueyasoori Moisés niquitioquiaari caapiqui saajianeequa na naajosano, saniniuuja Moisés niishitiojonura tiji nojori. Pueyasoori nojori niishitioquiaarijuhuaj taa nojori miiniutianiya, tariucua jiyanooshano nojori rerejonura na niquiara. Pueyasoori nojori sequequiaari-jiuhuj, nojuajaari puetunujuanaa na sequesano Abraham tohuateenutaniya nojoriria. ⁵Israel pueya supuetanaari quiquiaari Abraham, Isaac, Jacobonio. Pa Jiyaniija Cristoori cuno pojori niquiohuacujinio supuequiaari. Nojuajaari tari jiyatesaaquiaari Jiyaniija-janaa na quiniuria, puetunu casamijianaa jiitiana na quiniurajuhuj. Nojuajaari Pueyasojuhanaj, juhua na Quejuhuaj. iNojuaja cuara pueyaracaanu maniniuhaqueetasano quiiria! iCuara naa quiriia pueyaracaanutej!

⁶Quiarijiani, queraatia parta Israel pueyajiniinio pueyari maja Pueyaso muerasu. Naa cua sequesacari niajanijatej, majaari nia jiyaniinu tariucuaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuaja. Jaara naa quiritij, ¿casaara puetunu Israel pueyajanaa maseyaquiniutianiya Pueyaso sequesano nojoririaarini? Cua tojitiare pueyanaa. Puetunu pa supuetana Israel niquiohuacujinio supueno pueyajanaari maja seetanujanaa Israel pueya Pueyasora. ⁷Naajaariuhua Abraham niquiohua. Puetunu Abraham niquiohuajanaari maja seetanujanaa Abraham niquiohua na quiniu quiquiaari Pueyasora. Pueyasocuajaari naa sequequiaari Abraham:

“Cua sequesano quiajanijari saaja quia niyanu Isaaccujinio supueno pueyarano quiniutianiya cutara”.

⁸Naa Pueyaso sequesacari Abrahamtej, naacuajiti paari niishiyani, majaari

puetunu Pueyaso saquiriojosano pueyacujinio supueno pueyajanaa seetanujanaa Pueyaso muerasu. Saniniuuja, seetanujanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaana. Pueyasora, nojori cutaraari Abrahamcujinio supueno pueya. ⁹Abrahamri Pueyaso sequesanoocua tiuuquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini.

Janiyari jiyacari quia niquio Saara riuriatanutaniuhua tariucua mueyaracani”.

Naacuajitij, Isaac jaara rasaaquiaari, Pueyaso sequesanoori tohuateequiaari. Naacuajitij, puetunu Abraham niquiohuajiniiniojuanaani, saaja Isaacri Pueyaso saquiriojosano pueyano quiquiaari.

¹⁰Naa quiquiaarijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³Cuno caapueya royaquishacarijia, juhuanajuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenu-taniya na nuhujishana tojjiarani”.

Naa Pueyaso sequesacaritij, cunoori juhua Pueyaso sequesano tariucuaanu. Naa sequequiaari cuno royaquishoojua caapueyajiniijiiri:

“Jacoboori cua panishano quiniutianiya. Esauuri saniniuuja cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquirioquiaa cana na saquiriojonu paniyacujani, tama na miiniu panishanojuaja na tohuateenura. Naacuajitij, Pueyaso jaara

saquiriojore pueya, nojuajaari maja na niishiriojonu nojori miishanoinijiji; maninia, sesa soj.

¹⁴Naa Pueyaso miishacari tama na panishanojuaaajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. ¹⁵Pueya-socuaajaari naa Moisés sequequiaari:

“Janiyari pueya jiyanooniutianiyani teyano pueyano cua jiyanooniui panyacuajani. Naajuhuaaj, janiyari pueyanooqua tاراajenutaniyani, teyano pueyanooqua cua tاراajenu panyacuajani”.

¹⁶Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocuaajaari tama saquiriojoquiaajaa-ja cana na jiyanooniui panyani.

¹⁷Naajuhuaaj, tariucuaaanu Pueyaso sequesano Egipto jiyaniijaraari naa naajiotasano quiyajuhuaaj:

“Faraónnaa*, janiyari quia jiyatequiaari Egipto pueya jiyaniijia quia quiniuriani, cua cumaacata cua mijiosano cua niquitiniuria quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasojuanaa cutarani”.

¹⁸Naacuajitij, paari niishiyani, Pueyasoori tاراajeja teyanooqua na tاراajenu panyani. Naajaariuhuaaj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

¹⁹Naa cua sequesacari niajanijatej, tamonu naasucuaari sequenutaniya: “Pueyaso jaara naa miiquiaa taa na miiniui paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniui na miiniui panishanoinijini?”

²⁰Majaari naa sequenu pueyanonaa. ¿Canteeri quiajaniyani, naa quia juaaniui-

ria Pueyasotej? Paacuaajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniui: “Juaashiquiaracanaa, ¿casaara quia panirii conatura janiyani?”? ²¹Paniyojo-juacuajaari na naata paniniu maraujinijiji na panishano casaa, shanohua pataconiyojua, mashaca quiquiora manijinia cajitiariquiano conatunio.

²²Naajuhuaaj, ¿taa pa sequenutaniyani, Pueyaso jaara niishitiniui paniya na juaaniui, na cumaacanio, na saniitiosacari sesa mijiaa? Naajaa, Pueyasoori jiyanoohua rejeretaquiaa sesa mijiaa, cante tari saniitiosocoriquiano quiyacuajani. ²³Pueyasoori naa tarishiyajaara na saniitionura na tojitiaashijia pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quia na shuriucua quiriikianocuaajani. ²⁴Paacuaajaari cuno jiyanooshano pueyani, canapue tari Pueyaso saquiriojoquiaari-cuaajani Judiucacajinijinio, taucuacajinijinionio. ²⁵Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiaquiquiaarini, janiyari nojori sequenutaniyani: ‘Niaari cua quiquiohuanioyua’. Naajuhuaaj, cante cua shuquiritia-soo pueya quiquiaarini, nojoriiri cua timitiasano pueyara quiniutianiya”.

²⁶Naa naajiotasanoori quiyajuhuaaj:

“Tee cuniqui naa pueya sequesaa-quiaaricuajani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’”.

²⁷Saniniuuja, supuetana Isafasri naa sequequiaari Jacobo niquiohuacuajinio supueno pueyajinijiji:

“Israel pueyari jiyanhua canenutaniya, juhua shoniniacu caminia shuriuquioco paajia jaaquia, serojosoo. Saniniuuja, saaja secaja nojorijiniinioori Pueyaso pueyara jatanishaanutaniya. ²⁸Pueyasoori mijiriara na sequesano tohuateenu-taniya. Majaari na tarishiniu quiniutianiya”.

²⁹Supuetana Isaiascuajaari naa sequequiaari tarijiajuhuaj:

“Pa Jiyaniijia Pueyaso jaara Israel pueya niquiohua jiyanoaquiuiiaari, Israel pueya maara quiarijia quiyaquiri. Maara tari shaajasaacanu tojetaarucujanaa, naatej, taa Sodoma* tiacajinia quiniaa pueya puecoosaaquiuaricuaani, Gomorra tiacajinia quiniaa pueyanio”.

Judiocuacaari Pueyaso rupaacua tiuyashijiaca saaja

³⁰Naa cua pohuatasacari nijaniya tariucuacaanu Pueyaso Rupaajiniijitij, paari quiarijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarijia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiuushacari. ³¹Israel pueyari saniniuuja jiyanhua Moisés Rootasano tojiijia juucua, nojori jiyaniashacari Pueyaso naasucuaari naa nojori miishacari nojori jiyanooniutianiya. Majaari Pueyaso jiyanooniui quijia nojori. ³²¿Niaate niishiya casaara Pueyaso jiyanoaquiuiiaari nojorini? Pueyasoori nojori jiyanoaquiuiiaari nojori tiuyaquiniuucua nocua. Nojoriiri jiyaniquiaari tama nojoriijiaarija na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojishacari. Naaratej, majaari nojori tiuuni quiquiaa Jesucris-

toocua. Nojoriiri saaja na sooquiaa. Naacujitij, Jesucristoori juhua saajia nojoriira, nocua nojori tiuriiniuria.

³³Jesucristojiniji miriqui Pueyaso sequesano cuajaari naa naajiotasaaquiari tariucuacaanu, Jesucristo niyacarijia:

“Cua tojitiare. Janiyari Sión* tuhuana-nuucua nianutaniya saajiani, pueya tiuriiniuria nocua. Saniniuuja, cante nocua tiuyani, nojoriiri puetunu Pueyaso sequesanojuanaa na muerasurano masenutaniya”.

10 ¹Cuarta Pueyaso muerasunaa, janiyari jiyanhua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniuriajuhuaj. Janiyari jiyanhua nojoriicua tacayani. ²Janiya-cujaari seetanujuanaa niishiyani, Israel pueyari seetanujuanaa Pueyaso panishano miini panijiaca juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³Nojoriiri saaja sequequiaa, majana Pueyaso naata pueya jiyanooniui saaja nojori tiuushacari nocua. Naaratej, nojoriiri jiyanhua saniniuijuquiaa maninia nojori quiniuria Pueyaso niquiara tama nojori miishanotajaaja. Naacujitij, nojoriiri Jesucristoocua tiuyaquiuiiaa Pueyaso jiyanooniuria nojori. Pueyasojuanaari Cristo jiyatequiaari pa niti mosocoriquiano. ⁴Naacujitij, Cristo jaara mosaaquiari, nojuajaari Moisés Rootasano tojiniui tohuateequiaari cutara. Naacujitij, Pueyasoori puetunu nocua tiuuniaajanaa jiyatequiaa juhua sesa miyashijiacara. ⁵Moisés cuajaari naajioquiaari taa na rootasano tojiijia miiniutianiyan, juhua sesa miyashijiaca nojori quiniuria. Nojuajaari naa naajioquiaari:

“Cante puetunu cua rootasanojuanaa tojiijiani, nojuajaari pueyaracaanu rishijiara jiyatesaanutaniya”.

⁶Saniniujuja, saaja Jesucristoocua pa tiuushacari, paari juhua sesa miyashijia-cara jiyatesaaquiaani, pueyaracaanu rishijia pa quiniuria. Naacujitij, majaari naa nia niishiriojonu nioojiajinia nia taacanuusacari: “¿Cante na naata jiyocuacaanu tacanu Jesucristo na roshiniuria Pueyaso pueyara na jataniniuria pajaniyani?” ⁷Naajuhua, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonutej! ⁸Pueyaso Rupaacuaajaari tari naa naajiotasaaquiaari pajaniyara:

“Niaacuaajaari cua rupaa jiitiaa.

Niaari na niishiyajuhua. Nioojiajinia quiyacuajaari”.

Cuno rupaa canaa na pohuataquiaa niajaniani, cunocuaajaari Jesucristoocua nia tiuuniuria. ⁹Naacujitij, Pueyasoori pueya jiyatequiaa na pueya nojori quiniuria, Jesucristoocua tiuuja jaara pueya niquiara pohuatare: “Jesucristoori seetanujuanaa Jiyaniijiajananaa cutara”, noojiajinia na niishishacarijuhuaj Pueyasoori Jesu samiitiani quiaariuhua macujiniji. ¹⁰Seetanujuanaa naari: poojiata pa tiuushacari Neyanuucua, Pueyasoori pa jiyateya juhua sesa miyashijia pa quiniuria. Naajuhua, pa rupaata pa pohuataacari: “Janiya Jesucristoocua tiujiani”, jiyacaritij, Pueyasoori pa jataniquiaa na pueya pa quiniuria cutara.

¹¹Tariucuacaanu Neyanujiniji Pueyaso sequesanoori naa naajiotasano quiyajuhua:

“Puetunu nocua tiuuniaajanaari puetunu cu sequesanojuanaa cua muerasurano masenutaniya”.

¹²Naacujitij Judiocuaca, mariyata taucacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimiajata

na jiyanooniu nocua tiuujiaca pueya. Nojuajaari jiyanoohua capora. Jiyaniijiajananaa cutaraari. ¹³Tariucuacaanu Pueyaso Rupaajiniaari naa naajiotasano quiyajuhua:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijiajananaa, cua jiyanoori’”.

¹⁴Jaara naa quiriritij, ¿pueyatucua taa Jiyaniijia secojonuureni, nojori jaara nocua tiuyaquiyajaa? Naajuhua, ¿pueyatucua taa nocua tiurini, nojori jaara nojuajiniji pohuataaquishoo quiyajaa? ¿Nojoritucua taa nojuajiniji niishijia quirini, tamasa jaara quenaaja nojori pohuataaquiri? ¹⁵¿Pueyaso Rupaa pohuatanaatucua taa cuno pojoriucua quiaareni, nojori jaara jiyaramiquiyaquishaare? ¿Pueyaso rupaa pohuatanaate jiyaramiquiyaquishaaquiaari? ¡Maja! Jiyaramiquishaaquiaaricua. Naaratej, naa naajiotasano quiyari tariucuacaanu Pueyaso Rupaajinia:

“Jiyanoohua timitiasano pueya cutaraari, noo pojori canapuate tamasaacua quiajani, nojori na pohuatanura Pueyaso rupaa”.

¹⁶Naajaa, majaari puetunu pueyajanaa tojinii quiquiaa, Pueyaso Rupaa jaara nojori niquiara pohuataaare. Naacujitij, supuetana Isaiasri naa sequequiaari na taraajenuta:

“Jiyaniijianaa, majaari pueya tojinii paniniu canaa pohuatasano quiajanijiniji”.

¹⁷Naacujitij pueyanaa, paa jaara Jesucristo rupaa pohuataaareni, paari pa numaata na tojiyani. Paa jaara pa tojishanoocua tiurini, Pueyasoori pa jiyatenutaniya na pueya pa quiniuria.

¹⁸Pa jaara Pueyaso pueyara jiyatesaaquiaa saaja pa tiuushacari Pueyaso rupaacua, jaara naa quiriritij, ¿casaara puetunu Israel pueyajanaa Pueyaso

pueyara jiyateyaquishaaquiaariirini?
¿Cristo rupaateeri nojori niquiara
pohuataaquishaaquiaari? Maja. Nojori
niquiaracuaajaari pohuatasaaquiaari. Naa
naajiotasano quiyacuajaari tariucuaaanu
Pueyaso Rupaajinia:

“Pueyaso Rupaacuajaari puetunu
jiyacajinijananaa pohuatasaaquiaa-
ri. Na rupaari tojishaaquiaari
puetunu tiquiyocujanaa, jiya
puequeetujinia”.

¹⁹Jaara naa pohuatasaaquiaritij, ¿Israel
pueyateeri Pueyaso rupaa niishiyaquiquiaa-
ri nojori tojishacari? Maja. Nojoricuaajaari
na niishijiaca quiquiaari. Nojoriiri saaja na
ruuretajaca quiquiaari. Supuetana
Moisés cuajaari naa naajiotaquiaari Pueyaso
sequesano Israel pueyara, tariucua na
tojiyashijiaca nojori quishacari:

“Maninia cua miishacari tiquiyocua
quijiaca taucua nia niti, janiyari nia
juaatiniutianiyani. Niaari jiyanoohua
juaaniutianiya cua jiyanooshacari
mosanucua taucua”.

²⁰Na nuhuaji, supuetana Isaíasri naa maatia
sequequiaari Pueyaso niishitiosano nojuaja:

“Cucua jiaatiaashijiaca taucua
cutaraari cua riuriataquiaa, cua
tojijiaca nojori quiniuria cutara.
Naajuhuj, janiyari cua pajeyashi-
jiaca taucuaacua muetaquiaani”.

²¹Saniniuujia, Isaíasri naa Pueyaso sequesano
Israel pueyajiniji naajiotaquiaari:

“Janiyari puetunu juucajanaa Israel
pueyacuaji masequiaa juucuan,
maninia cua miiniu panishacari
nojori. Nojoriiri saaja cua shocote-
quiaa, cua tojiyashijiaca pueya
nojori quishacari”.

**Israel pueyajiniji cureenoori
Pueyaso saquiriojosano**

11 ¹Israel pueya jaara naa Pueyaso
tojiyashijiaca quiya, ¿Pueyasote
seetanujanaa nojori tarinitiacanu, na

tojiyashijiaca nojori quiniucua? ¡Maja
pueyanaa! Janiyacuajaari Israel pueyano-
janiuhuj. Abrahamri cua supuetana.
Janiyari na jiniانو Jacobo niyanu
Benjamíncuajinio supuenoni. ²Naacuaji-
tij, janiyari niishiyani, Pueyasoori maja
na cartenu quiquianu puetunu tariucua-
caanu na saquiriojosano Israel
pueyajanaa. ¿Niaateeri supuetana
Elíasjiniji naajiotasano niishiyaquiya?
Tariucuaaanu Pueyaso Rupaajinia naa
naajiotasano quiyacuajaari Elías sequesano
Pueyaso, na tacaashacari Israel pueya
quiniucua sesa:

³“¡Cua Jiyaniijianaa, cuarta Israel
pueyari puetunu quia sequesano
caminiujiunaa pueyajanaa
puecoorucuaa! ¡Saa janiyajaari
cureyani! Naajuhuj, nojoriiri
puetunu juhuacutucujanaa
niyarequetarucuaa, tee quia tojitia-
jaca pueya catijiaquiaa na seya
quiocuaracujani. ¡Nojoriiri quiari-
jia cua pajenuyajuhuj, na
motunura janiya!”

⁴Pueyasoori naa Elías riucuaquiaari saaja:

“Janiyari siete mil pueya jiiitaaajani.
Nojoriiri cua tojitiajaca. Nojoriiri
maja na mojoquetaconu quiquiaa
cuno sacuaraatia shipinishano
Baalcuara* cua niti, taa narta
Israel pueya miiquiaacuani”.

⁵Quiarijaari naajuhuj, Pueyasoori
secaja na saquiriojosano Israel pueyajini-
jio jiiitiaa, jiyanoootio na quiniucua.

⁶Naa Pueyaso muerasu nojori quishacari
saaja Pueyaso jiyanooniucua nojori,
naacuajiti paari niishiyani, majaari
Pueyaso saquiriojonu quiquiaari nojori,
maninia nojori quiniucua. Nojori jaara
maninia miijiaca quiriqia, nojori maara
paniyaquiri na jiyanooshaanura.

⁷Naacuajitij, paari niishiyani,
Pueyasoori saaja na saquiriojosano pueya
jiyatequiaa na muerasura. Israel pueya

saniniuujia, nojoriiri saaja maninia quiniuria saniniuujia juucua. Naajaa, majaari nojori naata tama na cuaqueya-jaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucujajanaa niishiyashi-jiaca nojori quiniuria. ⁸Tariucuaaanu Pueyaso Rupaajiniacuajaari naa naajiotasano quiya:

“Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarijiani”.

⁹Supuetana David sequesanoori nojorijiniji naa naajiotasano quiyajuhua:

“Pueyasonaa, Israel pueyari puetunu nojori panishanojuanaa jiitaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiritiasano casaa cuaara quiiiria juhua norijia tama nojori-riajaaja, nojori saniitiosaanura. ¹⁰Nojori jiuujia cuaara jataara juhua cariojuarujuriria, maja nojori niishiniuria seetanu Pueyaso rupaajanaa. Nojori cuaara porequetacoora socua, pueyaracaanu taaatia nojori miishacari”.

**Pueyaso jiyanooshacari taucuaca,
Israel pueya niti**

¹¹¿Niaateeri jiyaniya Pueyasoori Israel pueya cartequiaarijianaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiuushacari Jesucristoocua. Cunoori Israel pueya

jiaatianiQUIAA taucuacaacua, Pueyaso muerasu nojori quiniuriajuhuaj. ¹²Quiarijia, puetunu jiyacajiniajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiuushacari, jiyacaritij, socua jiyanoohua maninia quiniutianiyari puetunu pueyapuerajanaa, puetunu jiyacajiniajanaa.

¹³Taucuacajinijinio cuarta Pueyaso muerasunaa, cua tojiri. Nia sequenu panianijia. Janiyari seetanujuanaa jiyaramiquishaaquiaari Jesucristo rupaa cua pohuatanura taucuaca niquiarani. Naaratej, janiyari puetunu cua cumaacatajanaa pohuataquiaa Jesucristojiniji taucuaca niquiarani, nojori quiniuria Pueyaso muerasujuhuaj. ¹⁴Janiyari seetanujuanaa naa miiquiaani cuarta Israel pueya jiaatianura niaacua, nojori tiuuniuria Jesucristoocujuhua, noojiaqueya nojorijinijinio Pueyaso jiyatenura na pueyara. ¹⁵Pueyasoori juhua taanuquiaari Israel pueya nocuaji, nojori tiuyaquishacari Neyanuucua. Naajaa, naacuaajiti Pueyasoori puetunu mijiria quiniaa pueyapuejanaa jiyanoo-QUIAA, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jiyanoohua maninia quiniutianiyari puetunu pueyapuerajanaa. Israel pueya tiuushacari Jesucristoocua, nojoriiri juhua macujiniji samiitiaconutaniuhua. ¹⁶Seetanujuanaa maninia nia niishiniuria nio miriqui cua pohuatasanonni, maatia nia pohuatareeraj. Nia tojiri. Coteenujuanaa pa jiuniocotasanoo neecaruu jaara maninia quiri Pueyasora pa niqitiosocoriquiano, tariquiaari puetunujuanaa maniniajuhua Pueyasora. Naajuhua, naana nujuaca jaara maninia quiri puetunujuanaa, na cashacucuaari maniniuquiucajuhuaj.

Nio miriqui cua pohuatasanoori nia niishitiya cutara Israel pueyajiniji. Naacujajitij, Pueyaso jaara Abraham jiyanoouiaaricuaa nocua na tiuushacari, naacujajiti paari niishiyani, Pueyasoori puetunu Israel pueyajanaa jiyanooniutia-niyajuhuj, nojori jaara tiuuriquia Jesucristoocua.

¹⁷Supuetana Abrahamri juhua Pueyaso panishano olivo naana nujuaca. Saniniuu-jia, na jinianuucujajinio supueno Israel pueyari juhua na cashacucua. Cuno na cashacucujajinijinio jaara Jesucristoocua tiuyaquiquiaari, Pueyasoori na piyotaquiaari. Niajaniya saniniuujaia taucucanaa, niaari panishoo quiquiaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuj. Naacujajitij, niaacua-jajari puetunu Pueyaso sequesanojanuaa supuetana Abrahamra masequiaa tari.

¹⁸Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jiyaniyu niaa cutaraari socua maninia pueya, Pueyaso cartesano Israel pueyajiniji. Naa jaara jiyaniya niaari socua maninia pueya nojorijiniji, nia niishiri, niaari maja nia nujuaca rishitijia. Naa nujuaca cutaraari nia rishitiya.

¹⁹Naa naasucuaari sequeya: "Taaquiriirini. Cuno olivo cashacucujajari canaacuaji piyotasaaquiaari, saniniuujaia canaa rupotasaaanura nocua nojori niti". ²⁰Taaquiriirini, seetanujanaacuaaquinia-teja nia sequesanojuaj. Saniniuujaia nia niishiri, nojoriiri Pueyaso panishano naanajiniji piyotasaaquiaari, nojori tiuyaquiniuucua Jesucristoocua. Naaari saniniuujaia cuno naanaacua rupotasano quia, saaja Jesucristoocua nia tiuuniu-

cua. Naacujajitij, maja tama nia cuaqueyajaaja nia shuquiritianu nia jiyaniushacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucucanaa, niaa mariqui piyotasaaorohuari, niaa jaara Pueyaso tojiyashijiacara quiriouhua.

²¹Pueyaso jaara jiyanoaquiiaari na saquiriojosano pueyacuaa, nojori tiuyaquiniuucua nocua, ¿maatucua casaara jiyanoori niajanianijia? Naaacujajari taucucua. Naaacujajari maja na saquiriojosano Israel pueyacujajinio. ²²Naacujajiti pueyanaa, nia niishiri. Pueyasoori jiyanoohua maninia. Naajuhuj, nojuajajari saniitionu niishijia cutara. Naaratej, nojuajajari na tojitiaashijia Israel pueya jiyanoaquiiaari. Saniniuujaia, nojuajajari jiyanoohua maninia miiquiaa niajaniya na jiyanooshano pueya nia quishacari, niaa jaara pueyaracaanu nocua tiuujiaca quiriquia. Niajaniya taucucanaa, niaa jaara nocua tiuyashijiacara quiriouhua, niaari nocuaji rupatasaanutaniuhua.

²³Saniniuujaia, Israel pueya jaara Jesucristoocua tiuujiacara quiriouhua, Pueyasoori nojori rupotanutaniuhua na panishano olivo naanaacua. Pueyasoori jiyanoohua cumaacaracacujaja na rupotanuuhua na panishano naanaacua. ²⁴Niajaniya taucucanaa, niaari maja seetanujanaa Pueyaso saquiriojosano Israel pueya. Naaari juhua nacujiniaacoji olivo naana cashacucua. Naajaa, nia tiuushacari Cristoocua, Pueyasoori nia rupotaquiaari na panishano olivo naanaacujanaa. Naaratej, majaari jiyajeneta Pueyasora, na piyotasano olivo cashacucua na rupotanuuhua tama neyonaacujajaja, nojori jaara Jesucristoocua tiuujiacara quiriouhua.

Pueyaso jatanishacari puetunu Israel pueyajanaa na pueyara

²⁵Taucucujajinijinio cuarta Pueyaso pueyanaa, tariucucuaanu pueyari

niishiyaquijia taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jiyaniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaca quiya. Nojoriiri naa quiniutianiya, puetunu Pueyaso saquiriojosano taucacajinijinio pueyajanaa cuaara Jesucristoocua tiurijiaatijia. ²⁶Jiyacari-tij, puetunu Israel pueyajanaari jiyatesaanutaniya Pueyaso pueyaraju-huaj, taa tariucuacaanu Pueyaso Rupaajinia naajiotasaaquiaaricujani. Naa sequeyari:

“Sión* tiacajinia supenutaniyari pueyacuaji Tacuriquiano. Nojua-jaari puetunu sesa casaajanaa jaariutianutaniya Jacobo niquio-huacujinijo supueno pueya jiuujiajiniji. ²⁷Naa cua jiyanooshacari puetunu sesa nojori miishanojuanaatej, janiyari jiyacari tohuateenutaniya tariucuacaanu cua sequesano nojori supuetanaa-ni”.

²⁸Quiarijia Israel pueya tiuyaquishacari Jesucristo rupaacua saniniuuja, nojoriiri juhua Pueyaso paraa, Pueyaso jiyanooniuria niajaniya saniniuuja, taucacanaa. Naajaa, Pueyasoori cuno Israel pueya paniyajaa, nojori supetanaa quiniuucua na saquiriojosano pueya. ²⁹Pueyasoori maja na jaariutianu quijia na niquitiosano. Na saquiriojosano pueya jiyanoojaari. Majaari nojori na ruuretanu. Pueyasocuaajaari Israel pueya saquiriojoquiaari na pueya nojori quiniuria, maninia na miiniuria nojori. ³⁰Maniniushiquiari, niajaniya taucacanaa, niaari Pueyaso tojiyashijiaca quijia. Israel pueya tojiyaquiniuucua Pueyaso quiarijia saniniuuja, Pueyasoori niaacua taraajequiaa. ³¹Nojoriiri Pueyaso

tojiyashijiaca quiya quiarijia, Pueyaso taraajenura nojoriicua taa na taraajeya niaacuacuaani. ³²Naacuajitij, Pueyasora, puetunu pueyajanaari na tojiyashijiaca quiya, Israel pueya, taucacanio. Naacuajitij, Pueyasoori na naata jiyanooni nojorijiuhuaj, nojori tiuushacari Jesucristoocua. Pueyasoori maja rimiajata na jiyanooni.

³³iPa Pueyasoori jiyanoohua niishijia, maninia na miiniuria! iNojuajaari puetunu niishijiajanaa cutara! ¿Cante niishiquiaarini casaa Pueyaso miiniutiani-yani? Na miishanoori jiyanoohua jiyajeneta. ¿Cante na naata na niishiniuni? Shaaqui. ³⁴Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? iMaja! ³⁵¿Pueyasoteeri na panishano jiitaaquiquiaari tamon niquitionura nojuaja na panishano, na nuhuaji na niquitio-nuhua? iMaja!”.

³⁶Seetanujuanaa puetunu casaajanaa-cuaajaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. iPueyacaanu pa shuquiritiare pa Que Pueyaso! iNojuajaari jiyanoohua maninia! iCuaara naa quiriartej!

Saaja Pueyasora pa quiri

12 ¹Cuarta Pueyaso niquiohuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucuaajanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojiijia nia quishacari. ²Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohanu tojiijia nia quiri cutara, seetanujuanaa quiariniora

jatanishano pueya nia quiniuria. Naacua-jitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacuaajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanhua maninia.

³Jiyanoojia Pueyaso quiniucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu niajanijajanaa cua tojitiare quiarijia. Naa jaara Pueyaso cumaaca masequiaari nocua nia tiuushacari, nojuajaari puetunu niajanijajanaa jiyatequiaari tamaatia poonijiosano mijia nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijia nia quiniuria tamasacajiniji. Saaja jacaria niishiriojuaca nia quiri, maninia nia miiniuria nia poonijiosano, teyano Pueyaso sequequiaari nia miiniuriacujani. ⁴Pa cuaqueyajiniacuma, paari queraatia tamaatia casaa jiitiaani. Puetunu cunोजनाari tamaatia miiniu niishijia, maninia pa quiniuria. ⁵Paari naajuhuj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupetootesano pa quishacari, maninia pa miitioonura.

⁶Naatej, taa pa cuaqueyajiniacuma casaa tamaatia poonijiosano miiniu niishiyacuaani, naajuhuj, Pueyasoori puetunu na muerasujanaa na cumaaca niqutioquiaa, tamaatia miiniu niishijia nia pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pohuatnurani, nojuaja cuara seetanujanaa pueya niquiara pohuataara na taacanuyajiniutia. ⁷Naajuhuj, cante Pueyaso cumaaca jiitiaa pueya na

naacunurani, nojuaja cuara maninia naacuura pueya. Naajuhuj, cante Pueyaso cumaaca jiitiaa Pueyaso rupaa niishitiojona na quiniuriani, nojuaja cuara maninia niishitiojoora Pueyaso rupaa pueya niquiara. ⁸Cante Pueyaso cumaaca jiitiaa pueya na shiniujiuniuriani, nojuaja cuara pueya shiniujiunura, maja pueya cartenura Pueyaso rupaa. Cante na jiitiasanojiniji nareja niqutiojojuaca casamijiuucua pueyani, nojuaja cuara juhujaniya niqutiojoora nareja, nojori na paniniutia. Naajuhuj, cante Pueyaso pueya jiitianani, nojuaja cuara jiitiaara Pueyaso pueya nojoriicua na tacaaniutia. Cante taraatia miishano pueya naacujani, nojuaja cuara shuquiriaatia na naacuranon.

**Pueyaso tojjia nia quiri,
taa Pablo rootaacujani**

⁹Seetanujanaa panitiojuaca nia quiri. Puetunu sesa casaajanaa sooja nia quiri. Majaari maninia miiniu nia tarinitianu cutara. ¹⁰Jiyanohua panitiojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

¹¹Tama nia cuaqueyajaaja nia cumaquiri maninia nia poonijionura pa Jiyanijia. Majaari taajecori nia quiniu.

¹²Shuquiriaatia nia quiri pueyaracaanu, nia niishishacari taa Pueyaso miiniutianiya jiyanhua maninia na muerasuni. Saaja juhujaniya nia rejeretare nia jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³Niarta Pueyaso pueya jaara na panishano jiitiaaquiri, nareja nia niqutiojore nojori nia jiitiasanojiniji. Naacuaajiti, nojori jaara ruconaa quiri, nojori nia masuure nia tiacora.

¹⁴Naa jaara naquiya miishaariquia, majaari nia miitiana nia sesacanu. Saaja

nia secojore Pueyaso nojoriicuaru,
Pueyaso taraajenura nojoriicua.

¹⁵Cante shuquiriaatia quiyacuani,
nojoritia nia shuquiririjuhua. Saniniu-
jia, cante nujuqueyacuani, nojoritia nia
nujuquerejuhuaj.

¹⁶Jiyanootioojuaca nia quiriquia,
jatiqiu nia quiniuria maninia. Majaari
tama nia cuaqueyajaaja nia jiyatenu
juhua socua maninia quijiaca pueya
tamasacajiniji. Majaari pueya rerequeteja
nia quiniu. Saniniuujia, tama nia cuaque-
yajaaja nia mueyashitiri cutara, maninia
nia rupuenura paniyaquishoo pueyaju-
huaj. Majaari tama nia cuaqueyajaaja nia
jiyatenu juhua socua niishijiaca pueya
nia quiniuria tamasaacajiniji.

¹⁷Niaa jaara sesa miishaariquia,
majaari nia paraa nia naminiu saniniu-
jia. Puetunu nia miishanojuanaa cuaara
quiiria maninia puetunu pueya niqiuara-
janaa. ¹⁸Maninia nia quiri puetunu
pueyatajanaa, majaari nojori ruutaquenu
niaacuara. ¹⁹Socua cua tojitiare cua
panishano cuarta Pueyaso pueyanaa.
Niaa jaara sesa miishaariquia, majaari
nojori nia naminiu. Juhuaajaniya nia
rejeretare saaja. Pueyasocuaajaari niaacua
naminiutianiya nojori. Pueyaso seques-
nocuaajaari naa naajiotasano quiya na
rupaajinia:

“Quiria nia tarinitiare puetunu sesa
nojori miishanojuanaa nijaniya.

Janiyacuaajaari nojori naminiutiani-
ya niaacuani”.

Cua tojiri. Pueyasojuanacuajaari naa
sequequiaari. ²⁰Naaratej pueyanaa,
majaari nia paraca nia naminiu. Saaja
maninia nia miiri nojori taa tariucua-
caanu Pueyaso Rupaajinia
naajiotasaaquiaricujani. Naa sequeyari:

“Quia paraca jaara miaajeya, quia
miaqueterenoj. Jaara jiyamueyaju-
huaj, quia raatorenj. Quiaa jaara
naa na miiritij, tama nojuajaarjia

jiyanohua caririquiniutianiya
noojiajinia”.

²¹Naacuajitij, niaa jaara sesa miishaari-
quia, majaari nia juaani, niaa mariqui
sesa miijiara quirijaariuhua. Saaja
maninia nia miiriquia nia paraca.
Naacuajitij, niaari Sesaaca shocotanutani-
ya.

Pa jiya jiyaniijianucua tojijiaca pa quirij

13 ¹Pueyanaa, mijiria nia jiyaniijia-
nucua tojitiajaca nia quiri.
Nojoricuaajaari Pueyaso jiyatesano, nia
jiya jiyaniijianucua nojori quiniuria.
Majaari pueyano na naata jiyatesaanu
jiyaniijia na quiniuria, Pueyaso jaara
paniyaquiri. ²Naacuajitij, cante mijiria
jiyaniijianucua tojiyashijiani, nojuajaari
jiyaniijiaara Pueyaso jiyatesano tojiyashi-
jia. Cante naa mijiria jiyaniijianucua
tojiyashijiani, nojuajaari saniitiosaanuta-
niya. ³Paa jaara maninia miijiaca quirini,
¿paatucua casaara pa jiyaniijianucua
puereriquiani? Jiyaniijianucuaari maja
na pueretenu maninia miijiaca. Sesa
miijiaca cuaara na puereera cutara, sesa
miijiaca nojori quiniucua. Saaja maninia
miijiaca nia quiri. Naacuajitij, nia
jiyaniijianucuaari maninia poojotanutani-
ya nijaniyajiniji. ⁴Nojoricuaajaari
Pueyasora poonijionaa, maninia nojori
jiitianura nijaniya. Saniniuujia, niaa
jaara sesa miiri, nia puerere cutara.
Jiyaniijianucua pueyari maja najuhuanaj.
Nojoricuaajaari jiyaniijianucua cumaaca-
raca, sesa miijiaca nojori saniitionura.
⁵Naacuajitij, nia jiyaniijianucua tojijiaca
nia quiri maja nia saniitiosaanura,
naajuhua, maja Pueyaso tojiyashijia
nia quiniuria. ⁶Naajuhua, nia cumanee-
cajiniji nia niquitiore nia jiyaniijianucua,
taa nojori sequequiaa nia niquitionura-
cujani. Nojoricuaajaari Pueyasora
poonijioquiaa pueyaracaanu, maninia
nojori jiitianura nijaniya. Naaratej,

nojoriiri cumaneeca masequiaa nijaniya-jiniji.

⁷Naaratej, puetunu nojorijianaa nia niqutiore, taa nojori sequequiaa nia niqutionuracuajani. Naacujitij, niaa jaara sequesaa nia cumaneecajiniji nia niqutionura nia jiya jiyaniijia, nareja nia niqutiore. Naajuhuj, cumaneeca jaara jiya jiyaniijia masenu cojiritiasaa-re, casami nia masesacari, majaari nia juaaniu. Naajuhuj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuj, nia jiyaniijianucua tojiijia nia quiri, nojori quiniucua Pueyaso jiyatesano nia jiyaniijianucua.

⁸Pueyanaa, majaari najuhua casami nia poonu, niaa jaara cumaneeca quiri. Saniniujia pueyanaa, maja cutaraari niarta pueya paniniu nia puecanu. Pueyacaanu nojori panijia nia quiri cutara. Naacujitij, cante narta pueya panijiani, nojuajaari Moisés Rootasano tojiijia cutara. ⁹Supuetana Moisés cuajaari nia naajiotiquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohua-sejonu. Maja tamasa jiiatasano casamiicua jiaatia nia quiniu”.

Socua queraatia nia rootasanoori quiya. Niocuajaari socua pa tojihocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacuani”.

Paa jaara saaja nio Moisés rootasano tojiijia quirini, paari tari puetunu na rootasanojuanaa tojiijia quiyani. ¹⁰Cante seetanujanaa pueyano panijiani, nojuajaari maja sesa na miiniu narta pueyano. Naaratej, paa jaara panijia quiriquiani, paari puetunu Moisés Rootasano tojiijia cutarani.

¹¹Pueyanaa, nio nia niishiri. Pa Jiyaniijia rijionu juuca pajaniyari tari quenaacoya.

Cuno juucaari quiarijia socua cateca quiya paa jaara nocua tiuquiaarini. Naaratej, cante juhua maqueyajaani, nojuaja cuaara niucuaara, pa Jiyaniijia na poonijionura. ¹²Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquihua. Nojuaja cutaraari na cumaacata pa cuhuatanutaniya. Naaratej, puetunu sesa pa miiniujianaa pa cartere. Majaari juhua ninishiqui quijiaca pa quiniu socua. Taa pueya cushiquiaa na toque tariquicuaji na poonijionuracuaani, naa nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniurajuhuj. ¹³Seetanujanaa juhua Pueyaso pueya nia quiri. Majaari juhua ninishiqui quijiaca pueya nia quiniu. Niaacuajaari cuhuashiqui quijiaca. Naaratej, majaari mashaasequenujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatia nia quiniu. Majaari sacuaatia casaa miiniucua nia jiiitiniu. Majaari juayonuujata nia quiniujihuj. Naajuhuj, majaari tamonu pueyano jiiatasano casaacua nia jiaatianu. Naajuhuj, majaari nia juaaniu tamonu jaara nia shocotare. ¹⁴Naacujiti pueyanaa, majaari nia niishirionu nia cuaqueya nia shuquiritiniuria taa nia paniya sacuaatia nia miiniuracuajani. Saniniujia, maninia cutaraari Jiyaniijia Jesucristo niishitaja nia jiiitanura, na cumaacano. Naa nia miishacaritij, niaari juhua soldado-hua miaquetojojata toque cushiyojua, maja Sesaaca miitiniuria sesa nijaniya.

Maja quiarta Pueyaso pueyacuara nia rimiaaquenu sacuaatia

14 ¹Pueyaso pueyajinijinio pueyano jaara Pueyaso rootasanojiniji taacanuuja quiriquia pueyaracaanu, naajaa, na rupuejaca nia quiri. Majaari

nata nia juayonuujutanu tamaatia na niishiriojosacari Pueyaso rootasanojiniji. ²Naacujatij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia, cante Pueyaso rootasanojiniji taacanuujuani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. ³Cante puetunu casaajanaa miaqueja cutarani, nojuaja cuaara soyaquiiiria narta Pueyaso pueyano, cante na miaquesano miaqueyashijia saniniunijia. Naajuhuj, cante puetunu casaajanaa miaqueyashijiani, nojuaja cuaara sesacaquiiiria puetunu casaa miaquejajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniuriajuhuj. ⁴¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuaajaari nojori sequenutaniya, nojori miishanote maninia, sesa soj. Naajuhuj, pa Jiyaniijia Jesucristocujaaari cumaacaraca, na muerasu na jiyatenura maninia quijiaca nojori quiniuria.

⁵Cua tojiri pueyanaa, noojiaqueya Pueyaso muerasujinijinioori niquiriyatu juuca semaanajiniji jiyatequiaa nojori maniniuhuaqueetanura Pueyaso. Tamasa-caari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu niajanijajanaa cuaara taacanuyaquiiiria tama nia miishanojinijijiaaja, maja nia macuhujetenura nioojia. ⁶Cante niquiriyatu juuca semaanajinija jiyatequiaa samaatenu juucara Pueyaso na maniniuhuaqueetanurani, maniniacuaajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casaa miaquejajanaani, maniniacuaajaari. Pueyaso na shuquiritiniuria,

nojuajaari na miaquequiaa nocuara na secojonu nuhuaji. Naajuhuj, cante shu miaqueyquijia Pueyaso na shuquiritiniuriani, cuaara naa miiria. Nojuajaari Pueyaso shuquiritijuhuj na secojosacari Pueyaso, na natau na miaquenura.

⁷Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja. ⁸Paa jaara mijiria quiyani, paari pa Jiyaniijia rishiquiaani. Paa jaara cusoyareni, paari pa Jiyaniijia cusoqueeni. Naaratej, paa jaara saminio quiyajaani, naajuhuj, paa jaara tariucua macu quiyani, paari pa Jiyaniijia jiitiasanoni. ⁹Jesucristocujaaari cunora cusoquiaari, macunucua Jiyaniijia na quiniuria. Nojuajaari samiitiaquiaarihua saminiucua Jiyaniijia na quiniuriajuhuj. Naacujatij, nojuajaari pa Jiyaniijijanaa cutara.

¹⁰Naaratej, saaja niquiriyatu Jiyaniijia pa jiitiasacari, ¿paatucua casaara parta Pueyaso muerasu sojeaca quirini, nojori miaqueyquiniucua shuni? Naajuhuj, ¿paatucua casaara parta Pueyaso pueya sesacajaca quirini, nojori miaquenuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. ¹¹Tariucuacaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojoquetaconutaniya, nojori niishishacari janiyari seetanujanaa Jiyaniijijanaa cutarani. Puetunu nojorijianaari sequenutaniya: ‘iJiyaniijianaa, quiaari Pueyasojuanaa cutara! Puetunu quia miishanojuanaari maninia’”.

¹²Naacujatij, paari niishiyani, puetunu pajaniyajanaari Pueyaso rihuanenutani-

ya tamajaajani, na nequesoreesacari pajaniya.

Maja sesa pa miitiniu parta Pueyaso pueya

¹³Naacujitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaca quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niquiara nia miiniuria nojori jiyanishano sesa casaa. Nojori jaara saniri miiniu nia miishanocuaa, naacujitij, niaari tari sesa miitirii nojori Pueyaso niquiara. ¹⁴Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niquiara. Janiyari naa niishiyani cua Jiyaniijia Jesu rupaacua tiuujia cua quiniuucua. Saniniuujia, cante jiyaniyani-jia tamonu sumatuu na naata na jiyatenu sesa miijiaara nojuaja jaara na miaquere, nojuaja cuara miaqueyaquiirianoj. Jaara na pueresano saniri miaquenu, nojuajaari tama noojiaaja macuhujanutaniya.

¹⁵Naacujitij, paa jaara parta Pueyaso pueyano macuhujetere pa miaquenuucua na miaqueyaquishoo casaani, majaari seetanujuaana parta Pueyaso pueyano panijia pa quiniu. Jesucristocujaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casaa pa miaquesacari na niquiarani?

¹⁶Naacujitij, majaari nia shanacunu Pueyaso tojiyashijiaca pueya sesacanura Pueyaso rupaa, nia miaquesano casaacua nia juayonuujutanuucua niarta Pueyaso pueyata. ¹⁷Seetanujuaana nia sequeyanijia, majaari Pueyaso muerasu pa quiniu casaa pa miaqueyaquiniuucua, casaa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijia pa quiniuria, jatiqui pa quiniuria juhuajaniya. Pa panitiaajaari-

hua shuquiriaatia quijiaca pa quiniuria. Paacujajaari na Sohuanu jiitiaani, naa maninia pa quiniuria. ¹⁸Paa jaara naa quijiaca quiriqiani Cristora pa poonijio-sacari, Pueyasoori pa shuquiritiaa. Naacujitij, Pueyaso tojiyashijiaca pueyari maja na rerequetenu quiniutiani-ya pajaniya.

¹⁹Naarate cuarta Pueyaso pueyanaa, jiyanhua nia saniniujiuri taate nia naata maninia rupuetosano quiniu puetunu niarta Pueyaso pueyatajanaani. Naacujiti nia naata tama cumaquitooonujuaaja maninia Pueyaso muerasu nia quiniuria. ²⁰Majaari nia sesonu Pueyaso miishano niarta Pueyaso pueya jiuujiajinia, saaja nia miaquenuucua nojori niquiara nojori pueresano casaa. Seetanujuaana, Pueyasora, puetunu miaquesano casaajanaari maninia pa miaquesocoriquiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niquiara nia miaquenura nojori miaquesoo casaa, niaa mariqui nojori cushitioreeri. Naacujitij, majaari nia naata maninia rupuetosano quiniu niaa jaara nia miishanota taraajoriquia niarta Pueyaso pueya. ²¹Naacujitij, socua maninia juhuari maja pa miaquenura parta Pueyaso pueya pueresano casaa. Naajuhua, majaari pa ratunu jereeca mashaca nojori niquiara, cuno naa pa miishano jaara quiri nojori shiniujuniuria sesa nojori miiniuria. Naajuhua, pa cartere puetunu parta Pueyaso pueya jiyanishano sesa miiniu casaajanaa, maja nojori pa taraajonura nojori ruparetanura pocuaji. ²²Naacujitij, Pueyaso Rupaacua nia tiuushacari seetanujuaana, niaa jaara niishiya nia miishanoori maja sesa, tamajaaja nia miirinioj saaja Pueyaso niquiara. Shuquiriaatia quijia cutaraari noo pueyano, cante niishiyani na miishocoriquiano casaari maninia Pueyasora, maja noojia na macuhujete-

nura na miiniu nuhuaji. ²³Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujuanaa naa sesa quiniutianiya taa na niishiriojiyacuajani. Paa jaara casaa miaquere seetanujuanaa pa tiuyaquiniutia Pueyasocuaani, pa miaquesacari, paari tari sesa miirii Pueyaso niquiarani. Seetanujuanaa, puetunu pa miishanojuanaari sesa, paa jaara pa taacanunuta na miiriquiani. Naaratej poojiaari macuhujenutaniya.

Parta Pueyaso pueya pa shuquiritiri, maja tama pa cuaqueyajaaja

15 ¹Noojiaqueya parta Pueyaso muerasuuri juhuanajuaja seetanujuanaa Pueyaso Rupaacua tiuyashijiaca. Naacujitij cuarta Pueyaso pueyanaa, pajaniya, cante tari seetanujuanaa Pueyaso Rupaa tojjijiacuaaani, pajaniya cuaara nojori rejeretaara juhuajaniya. Paa jaara socua Pueyaso Rupaa niishijiacuaaani, nojori pa cumaquiri. Majaari pa niishiriojonu tama pa cuaqueyajaaja pa shuquiritiniuria tamajaaja. ²Puetunu pajaniyajanaa cuaara niishiriojooora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojjija na quiniurijahuaj. ³Paacuaajaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuquiritiniuria. Saniniuujia, nojuaja cutaraari tاراtia miiniu rejeretaquiaari na rupenura mijiria quiniaa pueya, nojori na jaariutianura Sesaaca. Naacujitij, nojuajaari nio tariucuaaanu tama nojuajiniijiaaja naajiotasano tohuatequiaari:

“Cua Quenaa, cuno pojori, canapuate quia sesacajacani, nojoriiri cua

sesacaajuhuaj, cua miiniuucua quia panishano”.

⁴Seetanujanaari pueyanaa, puetunu tariucuaaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanjiaajaariuhuaj. Naacujitij, paari juhuajaniya sashiya pa Jiyaniijiani. ⁵Pueyasocuaajaari pa cumaquina, maninia rejeretajaca pa quiniuria, cumanjiasano pa quiniurijahuaj. Nojuaja cuaara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. ⁶Naacujitij nia naata pa Que Pueyaso, mariyata pa Jiyaniijia Jesucristo maniniuhuaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷Pueyanaa, jiyanoootiojuaca nia quiriquia, taa Jesucristo jiyanooquiaa pajaniyacuaani, maninia rupuetootasano nia quiniuria. Naacujitij, pueyari Pueyaso timitianutaniya nojori niquishacari Judiocuaca taucucata Pueyaso maniniuhuaqueetaano jatiqui. ⁸Janiyari seetanujuanaa nia sequeyani, Cristoori mijiria niquiaari Judiocuacaacua, na tohuateenura Pueyaso sequesano nojori supuetanaa. Tariucuaaanu Pueyaso sequesanoori seetanujuanaa. Nojuajaari maja na sequesano na jatanu. ⁹Judiocuacara Cristo miishanoori taucucara quiquiaarijuhuaj, nojori maniniuhuaqueetanura Pueyaso, na jiyanooniucua nojoriijuahuaj. Tariucuaaanu Pueyaso Rupaajinia supuetana David naajiotasanoori naa quiyajuhuaj:

“Maninia quia miiniuucua janiya Pueyasonaa, janiyari quiajaniyajiniji poojotanutaniya maniniani

taucuaca jiyacajinia. Maninia quia miiniuucua janiya, janiyari quia timitianutaniya cua jaaquequejosa-notani”.

¹⁰Tamaqui Pueyaso Rupaajinia naa naajiotasanoori quiyajuhuaaj:

“Pueyaso niishiyashijiaca taucuacanaa, Pueyaso saquiriojosano pueya nia cojiri, mariyata jatiqui nia shuquiritianura pa Pueyaso”.

¹¹Pueyaso Rupaajinia, supuetana David naajiotasanoori naa sequeyajuhuaaj:

“Pa Jiyaniijia Pueyaso nia maniniuhaqueetare, puetunu nijaniyajanaa, tamaatia rupaaca pocuajaca taucuacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

¹²Supuetana Isafas naajiotasanojinijihuaj, paari niishiyani Pueyasoori taucuaca jiitiano panijia pueyaracaanu, maja saaja Judiocuaca. Naaratej, Isafasri naa naajiotaquiaari:

“Supuetana Isaf niyanujiniji supuenutaniyari pueya Jiitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajinijinio taucuacajanaari nocua tiuujiaca quiniutianiya”.

¹³Pueyasocuaajaari poojiajinia poonijiojua, juhuajaniya pa sashiniuria pueyaracaanu, nojuaja cuaara miirijiaatijia puetunu na sequesanojuanaa pajaniyara. Pueyanaa, Pueyaso cuaara nia timitiiria jiyanoehua. Naajuhuaaj, nojuaja cuaara nia jiitiaara juhuajaniya, canapute nocua tiuujiacacujani. Naacuajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohuanu cumaquishacari nijaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

¹⁴Cua panishano Pueyaso niquiohuanaa, naa cua naajiojinia cua nacasusacari

jiyanohua nijaniyatej, majaari nia jiyaniniu janiyari niaacuaji taacanuyajaan. Maja. Janyacuajaari niaacua tiuyani niaacuajaari seetanujuanaa maninia quijiaca. Niaacuajaari Pueyaso rupaa niishijiacaquhuaj. Naacuajitij, nia naata tama nacasutoojonujuaaja maninia, maninia rupuetoojuaca nia quiniuria Pueyaso niquiara. ¹⁵Naajaa, quiarijia janiyari niaacuara naajiyani cua niishitiniuhuaa nijaniya tarijia nia niishishano. Cua jiyanootiuri, nio cua naajiojinia jiyanoehua cua nacasunuucua nijaniya. Naa nia rootaanijia Pueyaso jiyatenuucua janiya Neyanu Jesucristo jiyaramiquishano, taucuaca cua pohuata-nura na rupaa. ¹⁶Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucuacani. Naacuajitij, Pueyaso Sohuanu poonijionuucua nojori jiuujiajinia, nojoriiri Pueyaso shuquiritasano muerasu quiniutianiyaquhuaj.

¹⁷Pueyasoara pa poonijiosacari, janiyari jiyanoehua timitiaa Jesucristoni, cua niquishacari taa taucuaca tiuuquiaa na rupaacuani. ¹⁸Majaari cua timitianu tama cua miishanojuaja. Janiya cutaraari Jesucristo miishano timitiaani. Nojuacuaajaari taucuaca tiuutiquiaa na rupaacua. Nojoriiri nocua tiuuquiaa nojori niquiara cua pohuatasacari na rupaa, naajuhuaaj, Pueyaso Sohuanu cumaacata cua miiniuucua nojori niquiara. ¹⁹Nojori niquishacari Pueyaso Sohuanu cumaacata cua miijosano, nojoriiri niishiquiaa cua pohuatasanoori seetanu rupaajanaa. Janyari pocuaji Tacuna Jesucristojiniji tari pohuataquiaari puetunu tiqiyocujanaani, Jerusalén tiacajiniji, puetunu Iliria jiyajiniarajanaano. ²⁰Naa cua pohuatasacari pa Jiyano Jesucristojiniji puetunu cuno jiyacajiniajanaatej, janiyari pueyaracaanu pohuataquiaari cuniquini, tee Jesucristojiniji tojiyaquishaquiaari

juhuanojuajacuajani. Majaari cua pohuatanu paniniu quiquiaari tee tamasa-ca pohuataquiaari tari Jesucristojinijini. ²¹Naa cua pohuatasacari Jesucristojiniji cuno pueya niquiaratej, janiyari nio tariucuacaanu Pueyaso Rupaajinia naajiotasano tohuateeriquiaani. Naa sequeya Jesucristojinijiiri:

“Nojuajiniji pohuatasoojua pueyari nojuajiniji pohuatasaanutaniya. Nojoriiri jiyacari niishiniutianiya cante nojuajani”.

Pablo naquerejosacari Roma tiacajiniara

²²Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquiniuu-cua cua quianura. ²³Quiarijia cutara, janiyari Jesucristojiniji pohuatanu tucuararucuaa tarini, tee Jesucristo rupaa tojiyaquishaaquiaari juhuanojuaja-cuajani. Janiyari Espania jiyajinia pohuatanu paniya Jesucristojinijihuaj. Queraatia marijaari tari cua shocojocanu pueyaracaanu cua naquerejosacari niaacua cua quianura. ²⁴Naacujitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriaatiani, na nuhuaji, janiyari paniniutianiyan nia naacunura janiya, cua quianura Espania jiyajiniara. ²⁵Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niqutionuhuaa cumaneecani, niya quiniaa parta Pueyaso pueya niqutiojosano nojoriria. ²⁶Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanoehua maninia miya. Nojoriiri tama niishiriojonnucanujuaaja nareja na cumaneeca niqutiojonura Jerusalén tiacajinia quiniaa casamijuniucua Pueyaso pueyara. Cunora, nojoriiri quiarijia na

rerateya cuata na jiyarosocoriquiano.

²⁷Nojoriiri naa miya nojori niishiriojoscari, maniniacuajaari nojori naacunura narta Pueyaso pueya. Seetanujuanaa maniniacuajaari nojori miishano. Judiocuacaari maja na jamuenu quiquiaari Pueyaso rupaa pohuatasaanura taucuaca niquiara. Naaratej, taucuaca cuaara saniniuuja quiarijia naacuura casamijuniucua Judiocuaca, nojori jiitiasano cumaneecata. ²⁸Naacujitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquiniuria nijaniya. ²⁹Janiyari seetanujuanaa niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰Cuarta Pueyaso pueyanaa, cua Jiyaniija Jesucristo nia jiitianuucujuhua, mariyata Pueyaso Sohuuanu panitiootesacari pajaniya, janiyari jiyanoehua paniyani nia cojiniuria janiya, Pueyaso nia secojonuta cucuara.

³¹Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhua, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyaroscocoriquiano cumaneeca nojoriria.

³²Naajuhua, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuan. ³³Pa jiyanoojia Pueyaso cuaara maninia jiitiaara puetunu nijaniyajanaa. Cuaara naa quiiriatej.

**Nata quiniaata Pablo saruhuatasacari
nojori niishishano pueya**

16¹Cuarta Pueyaso pueyanaa, nio maaji niaacua tiuquiniutianiyani, nojuajaari maninia maaji, Pueyaso tojjia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. ²Pa Jiyaniijia panijia nia quishacari, nia paniniutia nia masuure nia tiacora nio parta Pueyaso muerasu naacuna maaji. Niocua nia tiaco jiitiarenoj, taa nia jiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujua-cuaa. Cua naacujuaariuhuj.

³Quiria nia saruhuatare Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura.

⁴Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jiyanoehua nojori timitiaani, naa nojori jiyanootiuniuucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucucacajinijiniojuanaari nojori timitiaajuhuj, naa nojori miiniuucua.

⁵Quiria nia saruhuatarehuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia saruhuatarehuhua cua rupueña Epéneto. Nojuajaari coteenujuanaa Jesucristoocua tiuquiaari Asia jiyajinia. ⁶María nia saruhuatare quiriājuhuj. Nojuajaari jiyanoehua poonijioquiaari niaara. ⁷Quiria nia saruhuatarehuhua Andrónico, Juniasnio. Nojoriiri cuarta Judiocuaca. Nojoriiri cuarta nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori

panijiacājuhuj. Andrónico, Junias, nojoriiri socua coteenu janiyajiniji tiuquiaari Jesucristoocua.

⁸Nia saruhuatarehuhua Ampliato. Nojuajaari cua panishano pueyano, Jesucristoocua na tiuuniuucua.

⁹Naājuhuj, quiria nia saruhuatare Urbano. Nojuajaari pa Jiyaniijia Cristora poonijionājuhuj. Cua rupueña Estaquis nia saruhuatarehuhuj. ¹⁰Apeles nia saruhuatare quiriājuhuj. Nojuajaari puetunu casaajanaa rejeretaja cutara, Jesucristoocua tiuujia na quiniuucua. Aristóbulo tiajinia quiniaa pueya nia saruhuatare quiriājuhuj. ¹¹Naājuhuj, quiria nia saruhuatare Herodión, parta Judio pueyano. Naājuhuj, Narciso tiajinia quiniaa pueya nia saruhuatare quiria, noo pojori pa Jiyaniijiaacua tiuujia pueyatej.

¹²Trifena nia saruhuatare quiria, Trifosājuhuj. Cuno maajipohuari pa Jiyaniijia poonijionuujuaca. Naājuhuj, pa panishano maaji Pérsida nia saruhuatare quiria. Nojuajaari jiyanoehua poonijiojua pa Jiyaniijia. ¹³Rufo nia saruhuatarehuhuj. Nojuajaari maninia tojjia pa Jiyaniijia. Na nucua nia saruhuatarehuhuj. Nojuajaari juhua cua nucua quiquiaari quiria. ¹⁴Nio pojori quiria nia saruhuatarehuhuj, Asíncrito, Flegonte, Hermes, Patrobas, Hermasnio, mariyata nojoritia quiniaa parta Pueyaso pueyano. ¹⁵Naājuhuj, nio pojori nia saruhuatare quiria, Filólogo, necocua Julianio, Nereo, na rimiatunio, Olimpásjuhuj, mariyata nojoritia quiniaa parta Pueyaso muerasunio.

¹⁶Niarta Pueyaso pueya nia saruhuatare seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua sarhuatanura niajanija.

¹⁷Cuarta Pueyaso pueyanaa, nia numooteyanija, jiyanoehua nia cojuare tama nia cuaqueyajaaja najuhua tamaatia niishitiojonuujuaca pueyacuaji.

Nojoriiri Pueyaso pueya maapue cushitio-joquiaa, sesa nojori niishitiojosanota. Naacuaajitij, Pueyaso pueyari juaatoo-quiaa. Majaari nojori niishitiojonu pueya taa coteenujuanaa nia niishitiojosaa-quiaari seetanu rupaajanaa cutarani. Naa sesa niishitiojonuujuacaacuaji nia rupatere. ¹⁸Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaja nojori masenura. Najuhuaana shanohua nojori pohuatasano-ta, nojoriiri niishiyashijiaca pueya sapojoquiaa. ¹⁹Puetunu tamonu jiyacajini-jinio parta Pueyaso pueyajanaari niishiya, niaari seetanujuanaa Jesucristo rupaa tojitiajaca cutara. Naaratej, janiyari jiyano-hua nia timitiaani. Naajuhua, janiyari paniyani niishijiaca nia quiniuria, saaja seetanu rupaajanaa tojijiaca nia quiniuria, maninia miijiaca nia quiniuriajuhua. Saniniuujia, sesa niishitiojosano niishiyashijiaca nia quitiriquiani, maja sesa miijiaca nia quiniuria. ²⁰Naacuaajitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutaniya jiyocuara, Pueyaso tojijiaca nia quiniuucua. Pa Jiyaniijia Jesu cuaara nia cumaquiiria, shuquiriaa-tia nia quiniuria.

²¹Timoteo, cuata poonijiona Jesucristo-rani, nojuajaari cua sequeya nera cua saruhuatanura niajaniya. Cuarta Judiocuaca Lucio, Jasón, Sosípater, nojoriiri nia saruhuataajuhua.

²²Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataajaaniuhua Jesucristoocua tujia cua quishacarijuhua. Niojuanaa, pueyanaa.

²³Parta Pueyaso pueyano Gayoori nia saruhuataajuhua. Nojuajaari na tiajinia cua quiniuria cua masuucanu. Nojuajaari

puetunu parta Pueyaso pueyajanaa masuujua, na tiajinia nojori maquenura, nojori tiuquiiijosacari nio tiacajinia. Parta Pueyaso pueyano Erastoori nia saruhuataajuhua. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhua.

²⁴Pa Jiyaniijia Jesucristo cuaara cumaquiiria puetunu niajaniyajanaa.

Pablo maniniuhuaqueetasacari Pueyaso, quera na tucuatatasacari na naajio

²⁵iPueyanaa, jiyano-hua pa maniniuhua-queetare pa Pueyaso! Nojuajaari na naata cumaquiniu niajaniya, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa niajaniyacujani, cua pohuatasacari Jesucristojiniji. Pueyasojuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiojua, Pueyasoori jiyasohua tamajaaja na niishishano jiitiaja Neyanu Jesucristojiniji. ²⁶Saniniuujia, quiari naataja, paari niishiquiaarini, Jesucristocujaari mijiria niquiaari puetunu pueyajanaa na jaariuutianura Sesaaca. Tariucuaaanu Pueyaso sequesano caminiujiunaa naajionuutasanoiniji paari quiarijia seetanujuanaa na niishiya cutarani. Pueyaracaanu Quijia Pueyasocua-jari naa paniquiaari quiarijia pa niishiniuria Neyanujiniji. Quiarijiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaca nojori quiniuria, Judiocuaca, taucucanio.

²⁷Pa Pueyasoori jiyano-hua niishijia cutara. iPueyaracaanu pa maniniuhua-queetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.